



王

燁

原名良號不菴更號鹿田歙南俞岸人少有

至性年廿六為葛巾子集著易贊寧都魏叔  
子虞山顧景范番陽史漢水襄陽張長公皆謂其  
識淡養至晚入太學更今名又著有鴻逸堂集安  
丘曹實菴司馬武密靳熊封刺史咸手其一編謂  
新安第一巨手後客漢臯以疾卒有漢臯小草行  
世同鄉張君貫玉歸其喪通守蔣公素庵將  
為之窀穸一時學者咸稱為鹿田先生云

烏石

夜半山鳥鳴華星落前渚湛然開此心可為天地語流  
水不歸來孤篷淚如雨

贈朱翁仇池

聞說仇池山九十九泉水羊腸六六迴嵯峨青冥裏上  
有百頃田煮鹽粲雲子萬峯蟠隱阿抱才畜其美西溪  
挺遺老數椽寄西市蔚村與論學瑯琊共談史隸事管

不停倏已盈尺紙匪獨文業工一德齊譽毀棹艤岸豈  
移天空月何駛忘遇任歲時遊世同鹿豕健句比秋隼  
凜凜霜在齒佳名衆所尚有實名乃峙奚必問西秦卽  
此西谿是翹首山萬重欲語無可指他年小有天與君  
飯蒼耳

顧樊村招同袁野翁宋菊齋毛眉史盛寒溪曹一  
菴江葉園龔劬菴王隨菴沙定峯讌集卽事

寒氣日夜深榮木久凋瘁朔風苦憑陵出戶無可避  
東足遺老眷我十年寄披衣一尊舉傾懷總靡愧野翁  
著剛德到處潛鬼魅樊村經綸手小試吳水利菊齋守  
淳龐書法明大義眉史張幽渺搜剔表衆棄寒溪析羣

疑探源泝洙泗一菴言行齊不知世有僞藥園究遺經  
理囿馳上駟劬菴貫諸史躬耕肆勤勩隨菴振騷雅琅  
琅廊廟噐澄江來沙子與予最稱穉乃以異地賓顧令  
居上位沙子快茲集高倡鳴已意予也復何言一一爲  
詳次冰霜滿階除皎月已在地更憶梅中人毘陵莫能  
致

次韻答吳仲雲并呈梅岸伯御竹林

秋深炎氣驕夜露不敢白窺庭遽却步欲往畏咫尺鬱  
輪碾遙空肆虐何翕赫將曉懼向晨方晝恨未夕豈意  
中宵勞卧起形被役安得澍滂沱涼聲來大宅宛轉無  
一可決計拋載籍昧爽過豐溪好友弄泉石忽回三徑

清同攬滿林碧菊蕊耀圃隣桂香生硯席往復勿厭頻  
更躡登山屐貽我谿雲篇和之面徒赤

蘇州馬跡山

晉王遜真人升仙處

瀛島非東海神仙共此區燕昭情未潔漢武骨多愚  
雜下鷺聲亂番陽馬跡孤游神專御景領烝約旋樞出入  
無門戶希夷絕倚扶乘虛躋勝業研澹得真腴棘去明  
雙樹符離驗五厨火鈴曾莫擲木笠任相驅病起看敷  
坐邪拘聽招呼流沙隨地晝連苑卽心圖小篋妻難叩  
珍簧友自需暫行風雨夜不返晦冥途石室何靈闕瑤  
壇亦苑枯露淡編棄草秋滿芑殘梧軼事銷瓊笈遐踪  
尚冶湖竭來高枕臥世路正崎嶇

### 懷秋

寒煙乘老桂一夕故香空水淺羊裘澤雲淡鹿苑宮  
捫心三古後問影百年中道在吾當任身遺友未窮楚楓  
留照國吳苧自歌風劍去津門合樵來谷口通寂寥蹄  
軌外孤往亦冥鴻

### 雪夜飲吳次公齋頭聽程生擊鼓歌

吳子密室如舫中重幄迴楞不受風雪天擊鼓客聚坐  
狐裘酌酒犀炭紅初聞隱隱殘雷響楞外雪花大如掌  
紛披索索動檐櫂宛與輕拍情相宜停盃聽鼓還聽雪  
雪聲鼓聲兩奇絕忽疑冰雹亂翻空萬疊千槌那能說  
此時航船如雪飛童子側壺酒漬衣寒雞再號蠟未跋

枕前曉夢猶依依

次韵奉答靳熊封明府贈別長句并呈曹實菴公

祖

瓠落栖遲林下士敢揭虛聲向人耳少小名山事遠遊  
老大無成就衰齒憶昔童年愧家學朝吳暮越窮經史  
孰知實力匪他求外鷺何能歎觀止不如息影還舊林  
予臣弟友寧無旨人生若可同木石便請離群從此已  
我方待世世待我夫豈甘爲墮地矢故鄉召杜今壇坫  
快接高山與流水詩如三峽文九屏蘓陸韓歐正堪擬  
雲雷大業造髦俊盲者得視蹶者起小巫瞠目徒望洋  
相去奚啻云道里只今江漢翻狂波談笑滾滾見名理

龍旂大帥旣前席虎鬚將軍應倒屣遠人適歸自和溝  
幾處民訛動都鄙感公贈辭慚賦答藉此藤爲松栢倚  
有忱并達安丘公此日經綸需宛委

已巳七夕集栗亭研壽草堂分得七言古體限饒

字

清商未動炎氣高火雲照室如蒸熬人間黍熟得良日  
煮糜欲啜聲嘈嘈鄰家幾處陳瓜菓斜月庭中裊花朵  
百子池邊舊事徵雙星會上今宵坐共言織女渡天河  
繡幄雲輶抱恨多爲橋尚使雕陵鵲分巧偏貽下蔡梭  
樹幡散粉眞兒女青鳥班龍在何許愛他蟾影掛西林  
漸有涼颼到清醕瑤宮仙子八琅璈何似狂吟逸興豪

吾儕有巧無人乞不比劉郎拙用饒  
臥龍松歌寄壽屈翁山六十  
臥龍豈必深淵臥擾擾乾坤任相過有時伏向窮山中  
闕影潛光遠塵堞吾家黃山天下奇峯巒草木超凡思  
瑤花琪樹徧巖壑對面未許群兒知雲霞日月涵薰久  
長出靈松呈怪醜針撐累代不滿寸榦歷千年僅如肘  
細鱗蹙縮盈艾蒨矯勢拗折成蚴蟉森森離離非我事  
露月含星更何有臥龍松生巖石端石如女墻天所刻  
根萌石罅石髓餐引根裹脊誰爲安石窮根盡榦乃立  
分枝甘作丈尺蟠殷雷滂霧紛激蕩四顧欲去仍盤桓  
我當初覲卽歎息世間寧乏同此觀健兒武夫建旄節

豪傑往往摧羽翰願將玉符金冊付蟬鬢不將風篔雨  
笠持漁竿安能沓沓教眉攢番禹屈子吾老友少小詩  
名滿人口徧遊五岳方黑頭已見著書期不朽自言苗  
裔本高陽世德脩能吾敢負談經桓榮不拜徵闡易君  
平但奔走馬上飛章戀故交燈前草賦窺慈母只今六  
十奉北堂身作兒啼婦擊缶人生權世曷可程龍亦可  
屈蠖可伸聖賢竟與跼躄齒鷗豕赫然推鳳麟君家羅  
浮仙所窟曾否有人從問津青牛伏龜縱不測漫遭衆  
指徒嗟呻幸母藏詩語唐宋斧鋸剖出傳怪神不如黃  
山臥龍蟄終古如君無悶真其人作歌寄爾同于春

大雨孟冬八日大雨震電

大別山前三日霧對面無能辨岐路東南風急鶴亂啼  
震電盈空爲誰怒立冬涉旬水潦收江漢播蕩驚倒流  
空山病夫開兩眸侮人蛟鱷乘波遊今年夏秋苦炎燠  
赤脚莫措還嗟憂斯民與我共晨夕欲免不得唯搔頭  
入冬連雨豈遂厭此際相看愁溺墊狎羣吹浪舞江豚  
鯤鯨龍鼉挾勢奔一時所會任爾尊茲雨安得終朝昏  
病夫高臥他何論須臾廓徹開天門山川不改人物存  
顧爾好向深泥躡君不聞人間亦有屠龍手何況鶴豚  
真小醜

同硯村岸舫栗亭看梅賦得二十里中香不斷分  
元歌二韻

清麗江南地梅花處處村亂霞停碧淑積雪擁朱門萬  
樹偏成逸孤開亦見尊酒帘如待客相望淺淡痕  
久寂開青眼連郊日日過格從寒外老韻得淡中多香  
氣熏人遠靈風着面和白雲迴合處隨地引笙歌

曉雨再走長松菴望水香園梅花

雨後梅仍好青皇着意留助顏施霖霖分潤益清幽未  
肯辭人去何堪逐水流重雲休更暖且與護牆頭

同栗亭步長生菴回看水香園梅花更成奇麗共  
坐未久岸舫視村亦至

迴望皆成賞梅花格愈奇翻同初綻日不似欲闌時松  
竹增妍色樓臺映逸姿莫教風雨妬令我倍相思

朝來春氣透小蔬盡舒光四野流清照千山停夕陽層層生逸致細細散幽香好共橋邊坐相看味轉長

綠叅亭中秋分韻

修竹影相隨桐陰復柳絲幽光臨几硯清氣上鬚眉接砌煙雲變遠峯晴雨宜一亭於此立不受野風欺短垣通曲徑平步忽高臺有月能先得無人肯後來杯光池上灑石影樹邊開咲我佳辰隔詩留此夜裁

晚泊牛石

寒食春江棹停帆暝色幽亂山新漲出雙澗野雲留雨笠歸村渡風帘向客樓後時重過此澣石任眠牛

登邵石

卽小金山

邵石江中立還同燕子磯波搖如試掠雨重不成飛繡洞花盈屐芳洲草映衣先賢祠墓在登覽挹清輝

吳驚遠六十

秋風吹桂樹爽氣到前窗念我少微子高懷老未降黃雲方冪野白酒已篋缸良友躋堂頌應多筆似杠

漢上送黃偉士歸里

今古無窮恨吾生亦有涯如何羈楚客翻使折瑤華吠蛤方乘稻饑鷹不琢花異時相念處秋水望蒹葭

孫岱菴同遊赤蘄

昨從風雨過黃州訪古重來託勝遊有客吹簫能作賦無人握槳自登樓身疑夢裏橫江鶴興是樽前汎渚鷗

依舊山川相糾繆蒼蒼迎望為誰留

題蕭尺木畫

寫名園依綠水聯

竹欹晴灑閒花欲凌波渡不知第幾橋先認南塘路

題查二瞻畫

老樹不惹風溪午山影直臥起無可營亭中看鸚鵡

罨溪桃柳

春色板橋淡釣磯坐成賞流水不知去但有煙中響

芙蓉屏

木家萬山中却詔芙蓉遶靈風帶雨過斷虹帶松杪

石碧山麪石巖

巖石非桃柳我來碧蘚集蘿葉結春雲中夜山鬼泣

吳聖楫

字右舟歙郡城人以恩拔謁選得隴西文縣令陰平三載歿于官先生為諸生時才大長

于肆應以風雅為已任日講四始六義之學謂詩有根柢不敢視為當花對酒飲食應酬之具石耳姚山期贈書欽企為選歸舫詩存一編行世此則詩存中及見者遺稿散軼殊屬憾事

出潞河

鼓柁望南下河聲尚北流春風一葉渡夕照半帆收回

首瞻鳩鵲全身逐鷺鷥飄零孤劍在空自倚天愁

偶述

鶯老皇州候登舟十日風眼看麩麥綠傳說荔枝紅

時與閩中兩先輩同舟

博望年年過宣房處處同徘徊一惆悵浪

打衛河中

史天章汪蓮峰後予出都六日追及夏津喜而有

歸去詩相約征帆已共催寧知辭洛社猶未下梁臺千  
里停橈望雙舟返照來如何非久別顏比聚時開

守闌

迢迢星漢似咫尺渡槎難帆腹千張下河身一線寬雄  
談空白馬遠誤青鸞萍梗何時定鄉閭盡倚看

奉荅桐城張濬之卽依原韻濬之與孫易公同舟  
皆有惠句故末句並及之

河上淹遲日逢君李郭舟獻書何不達對榻且銷憂賦  
共興公艷吟高平子愁瓊瑤奚以報常愧木瓜投

史天章泊舟隔岸放涼次日以詩見投次原韻奉

荅

一葉波心裡風來水氣涼自稱唐魯望人比孟襄陽茗  
熟花香過詩成玉尺量盈盈衣帶隔中夜起相望

阻闌同泰州張因并溧陽史天章子修廻舟夜泛  
輕舸隨風蕩無人處便移共看南去棹反似北來時晚  
翠收蘭漿殘暉照酒卮座中王子晉高調入雲吹

濟寧午日望南池陳德修徐懿公招飲

雨阻登臨興南池入望虛樽前懷杜甫水上弔湘閭官  
柳重門鎖山榴故館舒主人頻醉客不覺接籬除

再次張因并游湖韻

汶上頻遲戀垂楊拂水涯幾人全忘客一夏半浮家息

浪蘆鷗靜衝烟水燕斜漾波晴較好酒向小墟賒

謁仲子祠

仰止先賢像殘陽饗殿開一村存古姓七尺聚高臺碑  
篆經秦沒河聲帶泗來晴瀾看起處流水亦雄哉

程式庠

字于周號不巖歛北江村人籍于楚以明經  
謁選得中翰隨大將軍削平黔中金沙諸地  
授貴陽觀察以事去官罷歸居里門一  
意嘯咏疾卒于家有有懷堂詩集行世

鰲山道中

萬山環抱處樹抄送微凉山菓名偏好閒花葉亦香居  
民藏兔穴甲士走羊腸竟日干戈裏踟躕對夕陽

示石城父老

兵火流離後義皇以上人力田無迂虎勤紡不懸鶉質

朴安天命于徐忘吏尊土膏今已動慎莫負宵晨

瀘溪卽事

小艇纔容足狂濤釣巨魚石全經斧劈山半帶雲鋤廣  
陌人烟絕孤城雞犬虛懸崖皆構屋疑是古巢居

望嶽

崔嵬直欲接穹窿古刹殘碑指點中遠近山情皆蟻垤  
參差樹色盡鴻濛白雲一徑仙源隱翠壁千尋輦道通  
天子不希秦漢烈至今車轍未曾東

祥符寺示恒公

漸覺機鋒盡可忘蒼苔綠蘚覆長廊鳥能悅耳何須字  
花但娛心不必香欲雨雲先封古樹已晴嵐尚濕修篁

丹泉猶是軒轅水洗我塵囂政自涼

送張友鴻還雲間

飄然縟暑別神州愛爾家園竹樹幽到眼睛雲成絕巘  
迎帆暮氣結層樓携來歌舞三春酒載去圖書一葉舟  
良友長安星向曉樽前規頌竟焉求

橫溪秋思

一人知己卽能容飽我清陰半榻松情未免淡翻似拙  
怨何敢怒竟成傭但聽莘野耕爲樂不許云亭禪與從  
蛩語三更聲淚下凄然還倩濁醪封

長安短述

雕弓羽箭據金鞍詔下元戎禮數寬海內軍儲皆餉楚

關東豪傑半登壇三年戰伐師猶壯十載招徠寇未殘  
安得昇平酌聖王河山不震莫如磐

旭日方升拜紫微權聲隱約出宮闈臣心伊呂先朝少  
主德勲華近代稀傍輦昭容新載筆隨班常侍舊摠衣  
皇都課績今伊始濟濟群公肅帝威

秋夜期玉山長袁玉策小集時玉策將還長沙

蕭蕭木葉嚮秋風銀燭青樽照碧空楚客愁多鄉夢切  
燕山露冷旅情同無心晚秀將開菊有意先彫已落桐  
羨爾歸車明月夜楓林獨對數株紅

丁酉中秋侍家大人飲宮毅庵署

天涯聚首倍傷情方寸何時五岳平清酒樽前慚祿養

新者居牙卷 右四  
微官闕下負科名三秋月是今宵滿百歲愁從此日生  
幸有嘯歌消骯髒不須勉強事逢迎

渡襄江

巖巖歷盡涉波濤勤遠偏宜入不毛險恃十年師已老  
名超五等爵何高難教飛將休龍戰自有將軍富豹韜  
廟筭及今圖永逸東南民力尚堪勞

皇清沅州雜詩

隱隱招提入翠微明山風景未全非溪回孤棹分飛輓  
日落荒城抱羽旂習見兵戈爭市馬新歸圖版尚扃扉  
殘碑到處留遺跡空載鴻文頌武威

長虹百丈亘清流小閣臨淵眺望幽此地誰人開戰伐

當年觸目盡田疇將殘鼠雀猶穿瓦屢困龍魚但避鈎  
不解瘡痍何日起寒烟落照總增愁

菴花夾岸昔成行剪伐於今榦已戕生意欲隨朝露盡  
芳名餘得落英香陽回大地能無怨月冷清秋只自傷  
何似武陵溪上好桑麻終古永相望

纔息驪黃又戒行帝心急願掃欃槍溪山歷慣翻嫌靜  
木石情淡不厭更丘墓幾年虛侑享飄蓬一葉學逢迎  
故園松菊清如許甘負陶潛處士名

六涼僧舍寄吳東池

秋風送客草蒼蒼鴻雁南飛啄稻梁昔日豺狼猶載道  
新來魑魅竟成行聲喧翠栢風吹老影靜浮屠月照長

只有一僧堪晤語衡山依舊是吾鄉

九日真峯山訪六鰲上人不值

非因九日強登山願共叅寥晝掩關洞自雲棲花不雨  
門原苔老石俱頑只餘啼鳥迎人語但有飛泉送客還  
回首孤峰天欲暮可堪偶影聽潺湲

安南道中寄劉翼雲

淒涼烟雨別離身道上猶疑色笑親因看遠山行漸到  
始知昨夜夢非真張騫不再通西域廉頗還思用趙人  
自是席珍應待聘無誇韓子豈長貧

吳

周

字後莊歙豐溪人口吃對客無多言詩源太白浩渺莫可窮詰東淘吳野人稱為一代作手予丁酉晤之泚水愛其月夜聞鵲詩年三十以病歿夔里王幼華黃湄刻其遺稿曰豐溪詩集行

于世

楊州月夜聞杜鵑

有懷不能寐策杖臨高臺天宇何寥寥江明煙樹開滿  
城歌吹歇夜半杜鵑來

贈汪二楫

我携一壺酒與君坐花間舉杯為君歌青春不等閒往  
昔嵇阮輩埋照日醉眠宇宙實齷齪斯人邈難攀濁水  
可濯纓何必清流邊人生苟得意何必求神仙與君結  
相知正當少壯年鷓鴣終一擊萬里摩蒼天安能學斥  
鷃籬下相周旋美酒願如河梁肉願如山裸體成大嚼  
焉知世上賢

詠史

淮陰釣魚日漂母進盤飧一飯猶思報未肯負人恩異  
哉越石父縲紲難自存大夫解左駮贖之載入門請絕  
一何速若有怨恨言士求在知己衆人何足論  
農夫憂百畝烈士死疆場安能戀妻子終年守窮鄉驅  
馬出都門四顧繁雲黃寒冬無草木鬚髮結嚴霜朝陟  
太行巔暮宿易水傍想見荆軻事撫劍心摧傷

送孫焦獲省兄之山西

三晉古霸國嘗聞重耳賢叢爾視齊秦功烈震當年只  
今蒲屈上寂寞空山川君去託憑弔驅馬秋風天  
賢兄處下邑令弟爲高士所學貴濟時何分隱與仕知

君懷此意命駕非徒爾百里絃歌聲坐看風俗理白頭  
甘灌園却笑於陵子

東吳處士賓賢

日暮暑氣徂柴門有餘清遠遠沙際月泛泛波中明榆  
柳旣垂陰藻荇亦交橫莎鷄出岸草振羽如欲鳴時移  
樂幽棲多病念友生倉卒岐路別浩蕩滄洲情老至會  
面難寸心何繇傾愁坐東軒下獨夜秋泉聲

雲峽

蓮峰九十九茲峰乃稱最兩石豎如劈歸雲憩其外獼  
猴上亦難跳踉見狼狽而我竟飄飄自恠心膽大崢嶸  
踏迴風語笑襟天籟八極試揮斥寧復知憂害王母空

中游縹緲停翠蓋欲乞金丹術顧已理猶昧終焉別妻  
子結宇傍青靄

登采石磯謁李青蓮祠

孤祠俯山麓倚檻松風清我狂寡所同可以謁先生登  
陟憶當年懷抱幽憤盈浮雲何處滅鷹隼徒飛鳴一樽  
置祠前直呼先生名先生不我應大笑我自傾江流觸  
崩石蕩激千古情

送郝髯

吳周送郝髯飲餞河之湄醉把郝髯袂爾去來幾時黃  
鷄初啄黍邨酒熟東籬秋光况如此正好賦新詩胡事  
不肯住請歌白駒辭吳周歌一章郝髯傾一卮歡宴夜

未艾孤棹心遲遲

效古體答王幼華

南山有猛鶻出入辟諸禽一朝毛羽傷數仞飛不任迴  
颺振層岡雨雪寒陰陰豈思鳳凰顧轉苦鴟鳶侵公子  
從西來獵騎何駉駉徘徊榛莽中爲我久沉吟清泉濯  
我身置之嘉樹林昔人見黃雀無乃同此心雖無鞞上  
思感激良已淡何當奮九天搏擊報知音

送江四

秋天漠漠秋雲閒蘆花蓼花開滿灣渡口布帆猶未挂  
解衣且看江南山金樽酌至明月土齊將絲管送君還

郝士儀

字羽吉號山漁歛西巖鎮人家真州好爲苦吟與東陶吳野人焦獲孫豹人邵陽王幼華

黃湄暨家悔齋及予友善周樂園先生稱其詩力深厚不隨波靡有損齋詩行世

寄吳野人

孤雲不可留冥鴻不可儔  
邈哉吳夫子屏跡滄澥  
賔春蓬戶下藜藿到白頭  
澤國數旱潦艱難爲遠遊

登康山呈王幼華二首

衢路忽相遇携手登康山  
解囊沽濁醪與爾同開顏  
庭前竹樹嘉幽鳥鳴關關  
緬懷康脩撰狂歌于此間  
樂府至今播高風邈難攀  
惟餘荒城下流水聲潺湲

王生家洽陽地接康公里  
每嗟生後時不得親風軌  
客路弔遺踪洒淚荆榛裏  
古道感至性隔世成知己  
逝者不可追滔滔曷云已

登采石磯懷王黃湄

時黃湄客揚州

亭午大江平帆檣風已微  
彌檝垂藤下聊登采石磯  
行邁屢臨眺茲來歲暮時  
青蒼遠近峰倒影涵漣漪  
徘徊孤亭上吟咏小謝詩  
江暖鳧翳浴天高鴻鴈稀  
俯眄寒松色永懷瓊樹枝  
引領望東北遙遙增慕思

馳暉沈浦溆烟水生東澥  
廣陵樹蒼蒼月下故人在  
秋風事遠游節序倏已改  
客有茂陵才邑少臨卽宰  
羈栖古佛樓思鄉淚空洒  
開牖俯平陸牛羊下荒壘  
此邦多富人詞賦誰當采  
我欲寄相思江臯歌蘭蒨

送吳後莊歸豐溪

落落不得志栖栖又遠歸  
獨行兵甲滿相送友朋稀  
子

婦同耕鑿溪山慰渴饑古人重貧賤努力掩柴扉

送汪長玉之皖江次舟次韻

皖江從此去惆悵廣陵花驛路三春半山城一水涯高齋晴見月古樹暮栖鴉有弟能留客依然醉爾家

止上送汪左巖歸新安

溪頭水禽飛客子憶漁磯紅葉寒山路看爾搖鞭去陌上秋風嘶紫騮翩翩賓從如雲流上國衣冠耀故里當筵詞賦驚諸侯父老如今幾人在唯有青松色不改白嶽秋晴峰入天黃山日暮雲成海鶴唳猿啼和嘯歌十日九日捫煙蘿歎息風塵吾已老草堂零落北山阿

登九華東岩寄懷汪長玉

朝登東岩巔遙見長江流江流何浩蕩終古無時休故人急孝養此中曾覆舟脫身蛟龍窟汎汎如輕鷗昨者蒙相念尺書千里郵及時對花柳勸我歸林丘東望夏雲生思君澣西頭飛去無羽翼遠心徒悠悠

雲峽

巨石何年裂容人曳杖躋艱難同蜀道髣髴有猿啼松樹穿巖竇僧巢嵌石梯寒空難久立歸去路全迷

懷吳陋叟五仄體

蟋蟀響四壁陋叟夜半醒月落屋角樹歷亂榻下影起步白露墜短褐肅肅冷憶昔客澣听與子共此境促膝善茗粥抱甕上釣艇倏忽十載度浪跡類斷梗勝事或

可繼撫几意耿耿

我生草莽中竊鄙禪中虱緬懷向子平私淑陶彭澤荆

棘牽衣裳遠遊苦未得送子上江舟我亦還山宅小市

販魚鹽窮村植芋栗有時望遠岫言念心超忽三疊瀑

潺湲五老峯峯律杖屨定留連登臨幸相憶

汪琦字三韓號琢菴休寧人與兄長玉舟次自相師友為詩豪宕英決不拘一格惜天死未竟

其才兩兄輯遺稿得百一篇目名曰百一詩

送吳後莊歸宛水二首

隆冬十一月凜凜寒風吹侵星做行裝遊子返柴扉聚

會苦佛鬱况復遠別離臨發把卮酒顧盼使心悲蕭條

江水上鴻雁向南飛分手在今夕高歌復何時

題程臨滄飛濤山樓

窄徑緣層石疎林見遠天窗開空水上人坐綠梧巔對

酒三秋月看雲萬井煙君家好兄弟夜夜此中眠

宿瓜渚從容菴

僧舍背荒城金山窗外橫春雲浮澗氣夜雨入潮聲遠

火江心白疎鐘樹裏鳴今宵行路子寤寐有餘清

涼颼來空齋吹我秋蘭香我兄遇初度歡笑臨芬芳歲

歲當此時行邁在他鄉豈不憚辛苦無以奉高堂茲辰

遠歸來兄弟森成行小弟何所祝願兄醉且康既康米

易負既醉勞易忘有餽適盈豆有酒方滿觴飲罷共起  
舞老親悅未央

君家有山樓兄弟居其中樓上圖與書樓外青梧桐近  
俯池邊水遙望江南峰良辰時過君樽壘不曾空誰知  
出林葉一朝各西東今來復登眺哀鴻啼朔風

邨夜歌

紅日墮盡新月微晚風蕭蕭黃犢歸遲回荒隴望遠人  
遠人不至烏鴉飛邨樹蒙茸邨路暝還我茅屋心恹恹

舟次二兄生日

寒梅香庭前草色新窗牖陽春何熙熙扣門來親友各

出懷袖詩笑勸延生酒仙人王子喬寧非人間叟松栢  
草木耳何足喻長久著書崇令德千秋庶不朽

題陋軒

避世偏宜東海涯短籬頽壁自爲家閉門看放淡秋菊  
枕石聽煎靜夜茶妻子高情輕凍餒乾坤此地有煙霞  
浮雲世事憑更換仲蔚先生髻已華

日之安豐場訪陋軒先生

限草澆迷市  
井五字爲韻

安豐東海濱蒼波日浩浩豺狼晝縱橫荆棘塞長道傳  
聞全盛時繁華映芳草羅綺街衢滿鄉黨往來好幾年  
遭歲凶人民色枯槁兒女償官租一身還不保野風日  
暮來凜凜傷懷抱

丈人居此鄉抱膝日長吟  
遠室兼葭長僻巷蓬蒿深入  
戶誰與俱妻子爲素心  
每逢明月上當軒坐鳴琴  
清响發良夜舉世誰知音  
老眼顧溟渤傷哉淚滿襟  
在昔聞君語君家板橋西  
中庭多梅樹柴門臨清谿  
春日何喧喧樹上鳴黃鸝  
策蹇涉長道行行范公堤  
中心慕伊人不愁道路迷

我來問君家君在樹陰裏  
携手入蓬門家人顏色喜  
清風起四壁居然隔城市  
籬落方栽菊溪流可釣鯉  
彭澤與嚴陵高風洵如此

止宿荆樹下高歌午夜靜  
邨鷄鳴嚶嚶北斗橫耿耿俯  
仰茅簷際海月淡花影  
錯燒松枝熱甕瀉清泉冷  
優哉

此棲遲不復懷鄉井

送二兄遊匡廬

嗟予苦負瘵偃蹇棲荒廬  
身不得負米終夜長歎歎  
君行爲菽水辛苦天一隅  
風雪幾千里去去各踟躕  
道路日以遠骨肉日以疎  
關河一揮手高天鴻雁呼  
我聞匡廬山秀絕五老峰  
峰頂出雲霧峰根蟠蛟龍  
日夜瀑布飛潺湲下虬松  
昔賢嘯歌處悠然餘清風  
吾兄躡青鞵懷古山之中  
舉衣入翠微舉手摩蒼穹  
俯仰江天際萬里空濛濛

九日登南城懷大兄長玉

黃花又見發東籬兄弟年年天一涯  
竹葉難傾悲杜甫

菜萸不插憶王維廣陵城上初聞雁百子山頭獨賦詩  
安得歸帆卽在眼持螯把盞對良時

少年行

少年逐獵草菲菲三月雷塘狐兔肥霽日城隅初映馬  
輕風堤上慣吹衣醉歌酒肆人爭看笑挽雕弓鳥不飛  
亭午隋宮簫鼓動霜蹄亂踏落花歸

悔齋夜集送吳仁趾遊淮陰孫無燁還秦郵

限黃字

綠酒紅燈夜未央愁聞遊子賦寒裳老烏廢苑啼衰柳  
殘雨輕舟濕去裝甃社湖中秋水白淮陰道上菊花黃  
浮雲黯淡風帆遠明日離憂各一鄉

九日懷楚老

故鄉蒼海畔此老更誰憐門有催租吏囊無買酒錢雨  
聲隋苑裏菊蕊陋軒前偏是逢佳節東西各一天

程謙

字山尊號豫齋歙郡城人以諸生入太學更由明經候選訓導性亢爽不羈善五言詩吳

吳興亟稱之有春帆集行世

放船

只在山光裏滌泗江水流十年長作客猿鳥識孤舟舊  
壘侵春草殘陽下驛樓離心知不寐明月與人愁

登釣臺

吳越多遺跡高臺自古今清風勞咏嘆白日愧登臨春  
入祠雲冷江連山木渚更誰垂一釣長繫故人心  
暮春藕花莊卽事同黃五若

新者風牙卷 右十四  
春煖興不淺，藜杖遠相扶。遲日翻紅藥，高煙擁碧梧。岸  
依沙鳥靜，人散水亭孤。愛爾能狂飲，青衫酒氣粗。

### 登焦山

滄江如此急，亂石自中流。翠滴雙峰雨，寒生六月秋。空  
天連海嶼，落日散漁舟。三詔何年事，清風古洞留。

### 宿雲聲菴

翠壁開天小，疎鐘一鳥還。偶因尋勝跡，到此忘躋攀。夜  
久月難下，江喧夢獨閒。何當遠塵事，卜築近松關。

### 登金山

危石負天地，中流幾戰場。野花開舊壘，古殿散空香。日  
落海門赤，雲連京口黃。相看無限意，江水但茫茫。

### 送鮑子韶

相對各依依，離亭向夕暉。不愁今日別，但覺故人稀。驛  
路秋風早，關河夜月微。廣陵多過客，珍重寄書歸。

### 十三夜教場步月過茶村寓樓

向來無此月，天意逼中秋。靜夜難爲狀，孤城祇獨遊。樹  
煙生海氣，鼓角動邊愁。何處歌聲發，相隨上客樓。

### 冬夜喜魏冰叔蔣前民見過兼訂遊黃山約

貧家有良夜，客至喜開尊。海月照初滿，梅花香欲繁。霜  
寒孤雁出，風定遠江喧。漸水還相約，春山到葦門。

### 暮春望後四日前民同賦

客來帶風雨，嘆息賦新詩。天碧一庭草，春明兩鬢絲。野

人猶近古吾道豈多岐此意為君問山僧亦未知

經漂母墓

一飯王孫死千秋誤鈞絲淮陰非凍餒雲夢惜羈縻流  
水孤帆繫荒煙野客思不知春草裏尚有幾人碑

江上坐雨同凌又蕙

江烟侵密竹帶雨坐來清隔岸誰吹笛經春未聽鶯客  
貧人事少僧老世情輕即此安飄泊淡尊對雨傾

黃元治

字自先號涵齋黔縣人順治丁酉庚子兩中  
副車善書工鍾王筆法徵寫實錄授平遠

通守著有黔中雜紀受事僅百日郡改為州一時  
諸苗父老請留不得爭送之又補臨江別駕丁艱  
補大理諸大吏聘修大理郡乘稱信史內陞宗  
人府參軍晉民部員外郎擢西曹正郎古文詞直  
逼昌黎所著詩集最富黃山詩滇南草俱有集休  
沐暇策蹇游西山紀游詩遍傳

輦下  
次白厓作

一時罕有及者此出  
近寄僅登其片羽云  
白厓為白王舊國漢武帝以白仁果為  
滇王至武侯南征時復封其孫龍佑那

為建  
寧王

巖巖山勢盡趨東煙火橫岡野望空峰頂亂松諸葛寨  
崖腰豐草白王宮行尋村外龍潭水坐話橋邊鶴髮翁  
歷代兵戈難復問紛紛飛鳥夕陽中

白厓曉發過定西嶺

去年度嶺未天明今度聞雞第幾聲如此崎嶇千仞上  
猶教昏黑五更行灌田白水雲端落震聲清鐘樹底鳴  
未到趙州三十里萬花谷口亂啼鶯

景東襍咏之八

倚山衙舍敞其柰從人稀好樹牽蛛網高簷縱鶴飛泉  
聲通沼細草色匝階肥疑入中書省花開艷紫微  
堂以退思顏侵晨卽已閒聊揮簽押筆便散吏書班日  
礙簷端樹天橫案上山幾回風雨過坐數鳥飛還  
別軒頻縱步繁綠蔭墻阿刪竹空虵穴留雲護鳥窠芭  
蕉穠影亂茉莉晚香多幽意從吾拙銜杯一放歌  
土城無半里四面却周圓外抱層層竹低臨疊疊田夏

蟲侵榻聒夜犬上墻眠自信能高枕更深鼓不傳  
每日半晴雨暄涼刻刻分棉衣須耐著藥酒合微醺飯  
飽無教睡香粗亦好焚衛生真有道不受瘴煙熏  
地劃東西岸人無三百家橋虛浮白板溪漲滾黃沙屋  
脊茅抽草墻頭樹釣瓜何年生齒聚處處滿素麻  
邊鄙茲尤僻毛蟲亦自殊白鷗同鴿食孔雀作雞雛土人拾孔雀卵以雞抱之地恨無鴻雁山憎叫鷓鴣墻隅千尺樹莫使  
夜啼鳥

地澗村莊少山高箐洞深虎狼蹲石壁鷹隼刷雲林鬼  
嘯青溪冷人行白日陰巖關分鳥道防禦最經心

蒼山寫韻樓懷楊升菴先生

寫韻樓爲升菴先生遺樓上有西像垂柳

新者風雅卷一先三  
篇亦先生題於舍資驛中  
有刻本今已剝落無存

折來龍女玉花枝欲仗西風寄所思寫韻樓存人不見  
朗吟垂柳舊題詩

丹青留得謫臣顏望闕心勞鬢髮斑非是金門歸未得  
君恩賜與點蒼山

同人遊感通寺卽登波羅巖之六

五雲鬱鬱擁山門總爲前朝鳳綵存寺有明太祖賜僧無極朝天詩二首

余爲重裝藏于樓上客到未教叅佛去焚香展拜御書尊

滿院龍縑鳳藻香其如僧不解珍藏寄聲鳥鼠無侵剝  
我欲雙鉤勒點蒼

殿前黃菊已殘秋別有松房竹樹幽行到白雲山下坐

風吹松子落茶甌

清華僧舍更幽清繞閣松濤接梵聲倚檻看魚魚不動

一池天影白雲行

矯首波羅巖路重欲登絕頂更扶筇聳身天上揮雲脚

拔出蒼山十九峯

僧廬兩舍總雲封左傍青崖右傍松篁到洞泉敲石火

一聲林鳥一聲鐘

潛龍菴二首菴在大理浪穹縣北十里爲建文皇帝遜跡故地中有遺像傍有應能希賢二忠墓時程濟已燬斯菴而去

邑人何星文同姚安高土官重建

彌茨河岸古禪關昔日飛龍卧此間自脫冕旒成白首  
誰傳衣鉢遯青山有靈草木忠魂戀無分陵園故主還

精爽定依遺像在泉臺人舊侍天顏  
萬花處處綻芳辰獨是僧扉掩水濱  
片碣有情留馬鬣孤雲不散想龍鱗  
岡巒赤染忠臣血洞柳青還故國春  
倚聽葡萄江上浪一聲哀咽一傷神

遊石寶山六首之四

寶石層層覆半空含虛容佛踞巖中天  
懸樹杪丹梯仄人坐雲端緝殿雄  
日色欲殘須海月溪聲不住又松風  
頂巔借問來朝路正閣鹵崖一逕通  
屋頭影已背斜陽遊侶青年脚力強  
路不通邊崖有佛足剛容處客燒香  
留將七尺黃山杖待上千尋白石岡  
徙倚東樓天忽暝亂雲歸宿樹蒼蒼

卓錫峰將托鉢連香爐南對殿門前  
誰題寶相空中額自結名山世外緣  
客已彈琴松樹下僧宜吹簫石厓巔  
月明懶向樓頭卧池畔還烹竹筍泉

捫蘿攀樹上層巔別有僧樓石壁懸  
嵌洞香龕原好屋浮甌雪乳是靈泉  
井如罈口纔容手逕在厓頭莫掉肩  
倚北一臺空遠眺澄瀾劍海碧涵天

下石寶山至甸尾途中雜咏之四

下山携得酒淡躡步步奇觀坐樹根  
怪石留人留不住化爲猛獸把天門  
蒼藤滿掛樹高榭穠綠垂垂似罩紗  
石抱松根松抱石萬松石上看茶花

好山別去意拳拳細雨霏霏萬樹煙雨到歇時山亦斷  
長橋鎖海海吞天

垂鞭馬足自駸駸風捲諸山雨霧淡一路黃沙無峻阪  
青松萬樹兩邊陰

白厓曉發過彩雲橋有懷和李中谿侍御韻

晚稻收殘野漲消沙頭荒艸可齊腰白厓月落霜花亂  
赤水天寒木葉漂南徼滇王封國早西京漢武拓邊遙  
五雲無復當時彩豸史猶題此處橋

自迷渡石梁過水目山途中之二

曉別緇廬日正東煙埃捲盡昨宵風洞壑深源花逕仄  
雲霄飛瀑石梁通重坡馬足黃塵上曲塢雞聲紅葉中

不待聞鐘知是寺松杪萬樹鬱菁葱

一入澗林逕路青焜煌紺殿影冥冥天風雖動人偏靜

山勢如飛地更靈眺遠重階黃葉滿凌空高閣白雲停

最佳翠栢枝盤拗半作闌干半作亭

雞足山傳衣寺作

寺前舊有古松已化于火山頂有華首門世傳迦葉波守佛金

襴衣以待彌勒寺因以名

見說山門好古松蟠枝天矯宛游龍卽今鱗爪飛何處  
剩有雲煙駐此峯石壁欲呼僧出定金襴誰受佛傳宗  
招提八十纜經此又聽風前別寺鐘

雞足華嚴寺

入林紺殿迥崔嵬山鳥銜花供茗杯人愛尋幽將出院

天教懷古更登臺神宗龍篆宣恩處聖母鸞文賜歲來  
莫啓琅函誇向客老僧會否閱多回

雞足大覺寺二首

淡林已過寺層層到此他山莫懶登今夜穩眠樓上榻  
何人高續殿中燈千重巒嶂惟孤客八十鬚眉是好僧  
相對茶甌無可說一池月影碧波澄

清晨初日照簷牙簷下池通水道佳竹筧倒流穿地脉  
錫筒逆激噴天花僧於佛法機鋒斷客出禪關意興賒  
昨讀前朝頒歲勅龍光回首覆朱霞

五華山感懷四首

突兀踞城腹居然第一山人煙松底下日影海中間

嶂低三面奔流鏤一關

滇池西注碧雞關抱之滇人於水積處皆謂之海不知

誰第宅輸與老僧閒

觸目橫今古無端思黯然風雲沉黑水雷電走青天飛  
隼秋林外啼鳥夕照邊誰家歌舞地草色久芊芊

自破梁王苑元公坐鎮強此山開幕府何釁起蕭牆黑

爨鴟張日黃巾蟻鬪場

沙酋反亂沐天波出走孫可望遂據有滇中鯨鯢今

復剪瘴雨霽秋陽

百戰山容赤孤標樹色青中天銷殺氣邊地起生靈金

馬朝京路黃龍祝 聖亭征鞍來日去無復嘆飄萍

過歸化寺有感二首

寺爲黔國公建

嵯峨碧殿出林巔誰記青山建寺年成化到今碑尚在

黔寧何往樹依然龍吟松蓋諸天上蝶繞毒花十月前  
處處幽香塵外賞禪房欲借一高眠

南征禁旅駐山巔屈指於今廿二年人遇戰爭僧穩臥  
地連壁壘寺巍然放生雞滿禪床上得食鴉馴佛殿前  
日暮幾聲鐘過去樹端齊處白雲眠

宿歸化寺

旅懷耽逸豈遜禪獨愛青松數百年浮世不關巢鶴夢  
勞人却傍老龍眠一林石氣雲歸寺滿院梅花月在天  
隨意濁醪三五盞山僧還為煮香泉

懷黃山木蓮花十二首往見中公有木蓮百韻詩

服其淋漓盡致此則未免學步矣

昔陟黃山最上巔  
芒鞋踏徧萬峰烟  
曾觀雨過鋪雲海  
未見春歸放木蓮  
根濯砂泉蟠淨土  
枝攢玉蕊麗諸天  
幾回夢想看花去  
不料風塵阻十年

挺出靈根百尺長  
不從水德植陂塘  
露含漢表初開萼  
雲帶空中過去香  
固是丰標宜上界  
應知種子自西方  
何年重到硃砂麓  
臥向花陰納夏涼

江南畫楫弄漣漪  
多少芙蓉寄碧池  
葉著雨時珠滾滾  
根孳水底藕絲絲  
向人妍態何如彼  
冠世清華止有斯  
古斷乾坤無二樹  
心惟不二法門知

鴻濛闢日卽山居  
今對風華想古初  
得倚星河高展佈  
不沾泥水獨清虛  
林中烟島惟聞鳥  
葉下雲濤不見魚

何用盤根通藕竅萬絲截斷自如如  
 何為初地獨依依看破繁華事事非未許詞人憑作幕  
 寧教逸士製為衣朝榮暮槿風旋落秋老蓮房露已晞  
 清淨獨茲承沆瀣參天玉幹十多圍  
 龍蔥歲暮不知寒長保先天氣獨完有似伏羲乘木德  
 曾經軒帝付金丹慈航邊畔舟難采甘露中間葑可餐  
 不向普陀洋裏去此心安處息波瀾  
 青玉枝垂白玉英空山無礙自縱橫雖非華嶽花千葉  
 却悟金身草一莖露作醍醐滋法味氣踰蓂蔔繞香城  
 現來萬佛樹承坐妙相毫光朵朵生  
 春花萬種盡成林獨此孤標寄碧岑色在空中寧著相

香生高處本無心陂中菡萏陳思賦木末芙蓉屈子吟  
 茲不求名誰物色山僧題句是知音

余曾萬里走南中滇有花名與此同但勝辛夷成木筆  
 不如苾芘產珠宮奇葩偏喜清波漾逸致尤宜薄霧蒙  
 終是故山花較勝題詩應讓老僧工

大理標山亦有木蓮勝辛夷色白惟

寧湖苾芘花極可觀花如蓮白瓣錦邊葉

荃似萼而長食之甚香美寧湖又曰珠湖  
 更聞嵩少白雲阿一歲三花是貝多面壁九年人已去  
 題詩百首意云何黃山法鼓金槌震丹井靈泉水鏡磨  
 木發祥光花更好蓮開十丈玉枝柯

法幢高建望崔嵬何意蓮從樹上開鐵甕真僧身到處  
 雪山老子手拈來白猿每向花時嘯孤鶴誰教日暮回

支遁清談風月夜我思元度定追陪  
潛溪口岸是陶家元亮東籬逸興賒已識廬山開白社  
寧容栗里醉黃花樽携竹葉投香積磬響蓮臺聽法華  
煩語遠公須待我莫教日向虎谿斜

與克已上人訪趙恒夫黃門不值賦此柬之

幼輿丘壑有餘思每憶黃山卽賦詩托鉢老僧今在此  
布金長者尚歸誰雲霞翠壁松千樹功德丹砂水一池  
我欲高磨峰頂石爲君題取大名垂

壽中洲和尚

手擎六六峰爲柱巨力全將大厦支重闢黃山金色界  
兼開白社玉蓮池鳥鳴極似彈琴韻猿嘯多因獻果時

詩賦乃其餘緒爾智珠圓朗映朝曦

雪莊和尚於雲舫畫種梅花汪栗亭先生賦詩十

章傳爲盛事依韵奉和

鴻濛闢後羣峰峭萬古黃山未種奔南國僧來巢翠壁  
西方佛喜到丹臺雲深谷口鋤開草樹少崖邊掃盡苔  
莫怪前人無布置好花專待此時栽

山高岩壑卽能平氣候過秋日易晴隙地根株隨手種  
寒天冰雪與心盟寧湏元墓花纔好不是藍田玉亦生  
無用摩挲憑造物年年華實坐來成

幽姿難得是知音與壑誰能踏雪尋不比漁郎桃洞口  
直同佛國菩提心老僧白髮留連坐高士清襟展轉吟

雖是植根為日淺要從絕頂結瑶林  
幾時天上播清芬皎皎風神自不羣未待層巔寒臘雪  
已教滿塢白秋雲遠公會為蓮開社王子猶呼竹作君  
似此冰姿遺世立妙香誰向老僧分

寒重溪山早放難開時莫作嶺南觀橫空得傍高松樹

礙路應芟細竹竿綴玉懸冰詞客賦摘英和雪道人餐

鐵脚道人真僧禪定能忘食臥向花邊夢亦安

不必高裁最上峰但教得聽道人鐘驚開寒谷雲千片

細貼新枝玉萬重皓首山猿叅白業縞衣老鶴宿蒼松

今聞十里幽香度吟嘯時時狎客筇

皮篷新葢草樓居種樹成林興自如花映鏡中空色相

根磻石下抱蟾蜍高低疎影橫青壁澹蕩寒幽上碧虛

自取賞心無伴侶不教雲海混龍魚

光明頂後昔經行欲看龍潭九疊清石笋缸迷淡雨霧

洋湖路梗舊榛荆寒林更有開春信碎雪都無著樹聲

何日歸尋銀色界香泉滌我積塵情

曾持瓶鉢別江東赴名天邊近日紅太液池畔花蕊

苗慈恩塔上鐸玲瓏放歸黃海蒙宸眷得種琪花奪

化工羈旅十年南引領幾回飛夢藥珠宮

雲舫今為羣玉山青霄頂上一僧閒地浮臘雪三千樹

天放春花第一班卸客調高人寡和林逋吟罷鶴初還

余將歸挈洪崖子謂洪去蕪來築茅堂四五間

*[Faint bleed-through text from the reverse side of the page, including characters like '山', '水', '詩', '意']*

吳

荃

字劍宜歙西莘墟人家巖鎮之梅莊籍本邑

自相師友喜為詩意言澹發自然高妙客游廣陵  
一時詩老如吳野人杜茶村曾青藜屈翁山咸稱  
之已未予客邗上曹司農秋岳先生謂予劍宜五  
律當與翁山頴頴翁山則謂我讀劍宜詩會當讓  
一頭地其為名流欣賞如此有花嶼堂集行世生  
平為詩極多而矜慎不以示人雖與僕稱莫逆索  
其詩亦未得睹全部也是編從離珠集  
選本登載尚當遴其全稿入他卷中

春日登平山堂

春風吹不斷引屐到平山遠岫一帆外層城萬柳間浮  
雲從北至游子未南還廿四橋頭月勞勞損客顏

籠鳥

翼翼乾坤鳥翩翩來去風唯知棲碧樹誰道有雕籠原  
野縈心曲軒檻在眼中主人休鍛羽猶敢憶長空

寄扶輪舍弟  
客緒終無賴  
臨岐語倍長  
烽烟猶未息  
書札遠難將  
野店荆扉月  
寒江荻葉霜  
白雲無盡意  
回首更茫茫

其二

歸路經過處  
江流亦變更  
壯心悲驥伏  
中夜感鷄鳴  
有弟池塘夢  
無衣風雪情  
竹西春樹綠  
好共聽啼鶯

雨中遣懷

春入溪光好  
花時雨獨侵  
白鷗應得意  
黃鳥似愁吟  
徑斷方池合  
庭昏老樹深  
誰人騎馬到  
漉酒與頻斟

潛虬山

花月虬山道  
乾坤此運存  
花明知已眼  
月照幾家邨  
古

澗迴林杪春  
溪灌石根時  
危甘養拙壯  
志學爲園

秋日同人集蔣山齋頭共用十二侵韻

微雨洗空林  
高齋思獨深  
蓬蒿開野徑  
蘆葦入秋心  
復誦鸚鵡句  
時鄭建遠後至以詩見示  
永懷梁甫吟  
歸途舒遠目  
雲樹

晚沉沉

九日過蔣山草堂值其自吳門歸用壁間韻

天涯搖落客  
九日過柴關  
蘆葦秋深處  
芙蓉水一灣  
歸帆迎白雁  
閉戶說青山  
恰有茱萸酒  
同斟坐不還

渡江

不盡長江水  
茫茫重客愁  
壯心徒擊楫  
吾道但孤舟  
浪湧何年寺  
烟深遠戍樓  
計程先鐵甕  
今夕此淹留

夜泊張官渡

二月張官渡維舟寒色深風危憎旅夜草淺見春心誰  
共班荆醉聊堪抱膝吟別來邗水上蕭鼓日沉沉

惠山亭子

一飲山泉水三年夢此亭重來試茗椀幽處勝中泠地  
不因人熱春還到眼青毘陵昨夜酒對汝片時醒

虎丘山樓望晴

最愛山樓曉晴窗入翠微無端十日雨閒煞一僧扉漠  
漠烟光合濛濛草色肥夕陽明滅裏極目寸心違

湖上

二月西湖上扁舟味所如童山唯見冢獵騎半爲漁剩

水含風遠春堤帶柳疎六橋烟景異極目一畝畝

孤山

世有林和靖茲山遂不孤寒梅依舊發野鶴爲誰呼願  
卜羅含宅空悲阮籍途飛飛雙燕子細語似留吾

拜鄂王墓

將軍不奉詔國事尙堪爲痛哭班師日君臣絕命時中  
原悲蔓草老樹發南枝展拜情何限山風颯颯吹

蘓公堤

觸處成今古茲堤屬大蘓葑田懷水利雲錦望晴湖南  
渡悲歌裏西冷風景殊我來當夕照迢遞惜征途

飛來峰

古寺藏幽壑孤峰何處來野蒼迤磴道石佛上莓苔塔  
影依泉落雲根向日開陶鈞豈無意欲別重徘徊

拜于忠肅公墓

先司馬與公同官先時休致未語及之

寂寞空山裏孤臣氣凜然八荒驚土木一老靖烽烟不  
效鴟夷去翻留碧血傳因懷我司馬勇退在當年

湖心亭感懷

亭子湖心出蒼茫別有天波光猶面面山色自娟娟兵  
甲爲今日鶯花憶昔年空餘明月在寂寞照歸船

淨慈寺

何年初地闢一逕白雲封樹杪浮珠閣池中到碧峰春  
蒼隨獵騎霜月出林鐘十里蒼涼路烟波信幾重

登吳山頂

獨出羣峯外江湖一望中吳存仍水國宋去失春風復  
有金笳引將無紫塞同輕舟吾道便歸卧百花叢

黃河

黃河萬里水滾滾向東來故道經時失新堤逐浪開  
朝廷憂轉運使者竭羣材渺渺懷神禹疏通力大哉

過任城南池望太白樓

歷歷南池上曾經杜甫遊題詩亦偶爾傳誦已千秋斷  
柳玄蟬咽殘碑碧蘚留一時陳迹異太白有高樓

四女樹

漢景帝四年恩縣傅氏無子有女四八事親不

字植槐四株矢志也後得仙術遂名其地云  
漢初敦孝行四女至今傳卜地栽槐日驚心不字年但  
知存子道誰復問神仙惆悵荒祠外河流起暮烟

七夕泊香林苑

晚泊香林苑樓臺水影中海潮生夕照梵響出花叢節  
序雙星夜羈懷落葉風扁舟明月在好與故園同

磬陽道中有懷家楞香大兄

磬陽古道陰驢背動高吟山徑杏花轉人家棗樹深停  
雲春黯黯歸雁晚沉沉一夜東風滿芳菲憶上林

登毘盧閣

極目憑高閣層城抱帝宮諸陵秋草裏萬井夕陽中

古戍存山海邊牆接大同當年形勢地颯颯起悲風

過石門

昔賢曾此宿青眼有晨門余亦來茲地心期誰與論平  
蕪明野燒落日動荒村仰羨歸林鳥幽棲自息喧

平原懷古

肝膽知誰向平原此寂寥繡絲徒縷縷風雨但蕭蕭行  
李淹茅舍村醪覓野橋英雄終老去懷古夜偏遙

釣臺

嚴子幽棲處雙臺一逕分長留漢時月飛出越溪雲絕  
磬松門古空山瀑布聞隔江臯羽墓次第仰清芬

富春山

盤紆青嶂出到此大江開側想嚴陵隱空煩漢使來潮  
生春渚亂帆帶夕陽廻我欲從茲老攜竿上釣臺

送曾青藜之燕

爲憶吳趨里霜華入苦吟客來邗水落秋到薊門深吾  
道知誰是人情豈自今西風寄鴻雁應念歲寒心

家兄時在

京邸

夜半

時家大兄在京邸四弟居故園

空墜木葉響浩露滴秋衣夜半月將落天高人未歸南  
看青岫迥北望白雲飛何日黃山路長歌入翠微

黃子雪田雨笠移尊茶村先生寺寓共用冬字

八年俱浪跡一醉在初冬語及真詩法欣看有道容霜

華明古寺寒月照疎鐘幸接元卿逕時時得過從

冬夜程亞韓勁飛過寓齋限韻

簷影照殘雪天涯孰與親一燈來二妙半醉得三人灑  
落詩無敵崢嶸歲欲新行藏還自問道在幾迷津

真州看莢花

清露凝朝逕桃花欲作烟青峰生野外綠柳到橋邊鳥  
雜歌聲遠杯澗春色前夕陽猶在望極目興悠然

久雨

夏雨過秋半天心不肯晴街流聲轉急野哭事多驚誰  
副蒼生望徒澗聖主情黃河失故道邗水日縱橫

次巖家兄至自赤岬賦誌喜

歎息交游薄情深有弟彘春風吹海角白首到柴門老  
去詩逾健貧來道自存只愁離別後獨此對清尊  
喜非狂家兄至自滇

廿載嗟離別南天憶苦辛碧鷄餘戰壘蒼鬢獨歸人痛  
哭懷諸弟入門驚老親相看唯脉脉喜極倍傷神

### 華孝子祠

孝子華氏名寶晉義熙間甫七歲父戍長安撫  
之曰歸時爲汝冠卒阻於兵父不克歸孝子年  
七十餘終不冠人每詰之輒流涕至齊建元中  
表其閭鄉人祠於惠山之麓

七十尙童子科頭待老親豈知看滅宋不得共逃秦淚

### 金之麟

字漢白別號菊磻歙西金邨人行二幼負至  
性入太學考授鴻臚寺序班不仕歸養家京  
江與筮江上侍御莫逆一時名下如程千一何雍  
南宗子發閔檀林查梅壑涂子山諸君交厚時與  
嘯咏已未還梓里曹寶菴司馬靳雁堂大令聞其  
才招與賦詩甚見欣賞近客衡陽著述益富敦篤  
故舊恂恂古處人以是更稱  
之所著有三餘齋近稿行世

### 暮秋送汪搢斯先生之楚

爲愛三山杖屨留不堪分手值淡秋正期林下題紅葉  
何意江干送白頭雨過停舟雲夢澤月明把酒岳陽樓  
詩篇君去同誰論搔首空齋只獨愁

### 懷汪搢斯先生

急雨初收草木新空江孤館一懷人故鄉白髮關情劇  
小閣青燈入夢頻老去登臨憑短策興來斟酌過比隣

明年擬作春歸計潭水桃花訪隱淪

薄暮同友過淡牧菴懷旻公遊廣陵

竹院無人靜掩扉一庭花木照斜暉鐘聲細逐清風去  
鳥影遙從絕巘歸放眼漸知羣動息論心但覺世情違  
遠公應念秋光返落葉紛紛點客衣

秋夜懷且公寓忍草菴却寄

涼宵新雁影雙過忽憶高賢隱薜蘿月皎澗林秋色遠  
風寒空谷夜聲多蒲團定裡蓮花漏木榻醒時白石歌  
方外不堪重結侶野人今已廢吟哦

冬日李桐坡期遊焦山

風急濤飛小艇欹携尊遙赴故人期山寒木落客初到

石古苔荒字半疑

謂瘞霍銘故跡

世事幾聲疎磬外詩情萬里

夕陽時為貪幽興登臨久月滿空江返棹遲

送舍弟還里展墓

故園春事正芳菲孤棹天涯及早歸野水一江蒲已綠  
家山到日筍應肥鵲聲月冷驚殘夢柳色朝晴拂短衣  
三載未登丘壠上試看松栝漸成圍

同徐臞菴閔檀林諸同志焦山看新綠訪古音上

欲辨亦人不值

南徐雨霽春光好不到焦山興不休古木影沈江水碧  
野花香散竹林幽老僧問法乘杯渡勝友探奇策杖遊  
待得潮聲湧明月微茫一棹返中流

得涂隅軒先生書感懷  
別來清夢夜頻依書到緘開事事非萬里飄零鄉井改  
十年戎馬故人稀孤懷老去惟耽酒永日詩成但掩扉  
為報涼秋復東下片帆好與雁同飛

題家大兄濯泉圖

此地無塵垢朝朝亦濯泉輪蹄既絕跡雞犬合成仙石  
潤疑經雨林淡欲蔽天還湏着小弟形影共周旋

暮冬送汪遙光歸阮溪

幾載淹留邗水客歲除歸興欲如何荒村寒逼鷄聲咽  
野岸風吹雁影過椒酒高堂娛白髮梅花野館放清歌  
阮公溪畔應遐覽三十六峯晴雪多

初夏村居

松堂塵遠不勝清隨分圖書愜性情殘月枕邊聞杜宇  
淡烟堤上聽商庚山鄉穀雨喧茶市野店花陰戰酒兵  
更喜到來無俗客容余疎嬾少逢迎

草廬中得旻公札

遙憶安禪修竹裏定時應見雪中山寸心不肯隨人別  
清夢迢迢自往還

傲白香山何處難忘酒二首

何處難忘酒庭前花正開好風吹雨散明月破雲來對  
奕非期勝分題不待催此時無一盞何以助徘徊  
何處難忘酒故人相晤時共談千里夢各出幾篇詩世

事全非古人情半可疑此時無一盞坐對亦何爲

春日同諸友登金山

江平小艇趁微風晴日登臨一望空樹杪欲連飛鳥道  
山根常閱老龍宮五更鐘磬隨潮湧萬里波濤觸石雄  
遊屐總緣春事好誰將杯酒醉裴公

社日送大兄還里省墓

令節催歸客征蓬帶雨過寒林春鳥少空谷夜猿多興  
好惟耽酒情孤只放歌請看丘壟上松栢竟如何

舟過桐江拜嚴先生祠

忽覺山川異登臨拜隱淪潮來猿嘯月花落鳥啼春萬  
古荒臺在千秋孤曜新英雄如逝水那復此垂綸

薄暮登金山絕頂

微醺登絕頂一望海雲消明月浮孤嶼寒風挾暮潮僧  
歸孤磬寂客散片帆遙此際有真意山情愛沈寥

舟晚卽事

一棹殘陽裡推篷兩岸明草枯荒月色林邃積秋聲市  
火星同亂漁舸葉似輕濁醪拚獨醉不使旅魂驚

十五夜山館翫月

墻角光纔動飛輪忽湧庭點衣螢火暗舞影竹枝青漸  
起浮雙島孤高掩衆星欲憑欹枕夢騎鶴弄蒼冥

同筠岡兄晚步玉山寺

潮聲喧落日忽變一江霞亭迥消炎氣崖虛拍浪花梵

音孤磬和漁火半帆斜不分清幽地都為衲子家  
旻公招集有作 時余自里中至

半載不相見情淡似隔年到來佳節後快集好花前谷  
響傳秋籟庭昏散晚烟老僧看客醉應悟酒中禪

曉度新嶺

一嶺挿霄漢歸人帶曙攀路凝經月雪僧掩定時關凜  
冽絕群鳥崢嶸壓衆山計程家不遠遙指白雲間

祝查梅壑先生八十

訂交許我作忘年幾見黃花映綺筵青史應同陶令載  
丹砂定自葛洪傳甲申塵起無踪跡乙卯風流有後先

董文敏公乙卯生先生亦乙卯生世稱先生為後乙卯人云 別是三多人未識詩篇

添入米家船

星辰變動曙光遲便向林泉探紫芝殘夢驚聞滄海異  
潔身恥讀北山移聊將筆墨供周粟肯以文章繼楚詞  
八十容顏如四十六槎老叟竝稱奇

種竹五首贈周桐岡先生

卜得書堂近市闌閉門岑寂似溪山一庭風月君為主  
三徑蒿萊手自刪為欲淹留嵇阮輩因思彷彿渭淇間  
從今綠玉娟娟色常伴清樽照醉顏

空宅雖云借一枝賞心端不讓徽之舍君那可同朝夕  
結伴何堪論歲時雲氣欲消叢掩映月光未到影參差  
也知稱得幽人意漸許兒孫長滿墀

老僧榻伴碧琅玕為破莓苔贈數竿時旻公移贈數竿慈母頓

教離佛地稚孫還見入詩壇虛窗夜氣添風響精舍炎

敲變日寒珍重更傳培養法護根須設曲欄杆同勝

君家曾有愛蓮人又見淡情寄綠筠勁節雪霜能自守

貞心松栢可為隣纔移便覺塵氛遠久對還令逸氣真

欲就林中一把臂莫如張鷹不延賓

湘妃雲母漫相求預想林成事事幽引鳳定從丹穴至

化龍還向葛陂遊風前隱隱微香度雨後沉沉積翠浮

他日漁竿須贈我烟波艇上狎輕鷗

秋日懷故園

四山環遶小邨居每入秋來興有餘田父邀嘗雲子飯

溪翁携贈石斑魚桂花發處金相似楓葉飄時錦不如

久動鄉情歸未得夢魂夜夜到吾廬

種秫人家新酒香瓦盆盛酒對斜陽那知天地有塵世

但引妻兒入醉鄉蟋蟀聲中茅屋冷蟾蜍影裡藥畦荒

無端作客逢搖落不及南飛旅雁行

十七日同區湖諸友翫月

情淡未忍暫離羣待月還招舊酒軍光比昨宵遲一刻

圓從望日減三分歌聲宛轉憐紅豆時有度雁影微茫

認碧雲夜靜更從高處望滿城烟樹白紛紛

暮秋到家即事

歸心竟夜逐西風忽到還疑夢未終三徑尚存籬下菊

一邨盡繞嶺頭楓梨過寒露名秋白稻近重陽號晚紅  
慚媿勞勞無寸補何如老却此鄉中

秋日田家

涼風入戶喜秋新禾稼初登不怨貧莫倚已功倉廩實  
須知天意雨暘均鑿成玉粒輸田稅歛得金錢賽土神  
作苦勿爲農父歎年年歡聚一園春

高臥衡門挂綠簔月明與客唱樵歌盤無鷄跖休嫌儉  
酒縱龍膏未必過婚嫁半村男女畢饗殮一歲稻梁多  
年豐且及時行樂莫負終身隱薜蘿

旻公六十初度

僧臘頻看歲月馳雪霜早已上鬚眉掩關有癖原非病

虛座無言未是癡半世友朋幽磻竹十年夢幻隔江詩

旻公五十時罹禍在外曾以詩寄祝堦前白晝濃陰覆留客清齋自剪葵

蕪陰履賢師訪旻公來京口賦此志喜

柴門開向赭山巔中隱清羸一少年違別嶼磯神女宅  
來叅浮玉宰官禪挂帆江上乘風便揮塵堦前指月圓  
却羨主賓耽韻事看花對寫碧雲篇

何昭夏至自故園

時昭夏失偶又喪良友

楓落空江籬菊殘客來爲拭淚痕乾淡閨友卜他生願  
古調人成隔世歡夢帶雞聲還竺岫帆衝雁影下嚴灘  
燈前相對莫惆悵爛醉何愁孤枕寒

題贈周桐岡先生新移書屋

新者風雅卷二菊七  
淡淡曲巷隱書城稱得幽人避俗情  
菰圃幸無徵稅例  
結隣偏有賣花聲  
泉生石竇魚爭躍  
風振珠幢鴿不驚  
相去衡門剛半里  
兩邨喬木認分明

走筆乞淡牧庵菊花

旅夢初回漏未終  
一簾殘月響秋蟲  
驚濤不捲松含露  
疎影頻移竹舞風  
相對急須延壽客  
徧求難值賣花翁  
遠公亦有淵明癖  
莫惜寒芳乞數叢

咏照水梅

東風一夜透冰肌  
蜂蝶雖狂半未知  
樵艇放來低拂棹  
釣竿垂去倒牽絲  
蔚藍浸影疑雲起  
澄碧浮光見月移  
對此幽情無可賴  
倚欄高誦水曹詩

晤鐵夫上人知檀林先生七十初度留焦山旬日

余媿未得過從賦此却寄

首句用少陵

人生七十古來稀  
還問焦巖舊釣磯  
盡攬秋光時拄杖  
貪看月色夜添衣  
山中詩衲逢齊已  
天上文星逼少微  
水有雙魚空有雁  
尺書何不到柴扉

贈鐵夫上人和檀林先生韻

清比寒梅不受塵  
千江明月印前身  
解空已得心無住  
分韻兼疑筆有神  
風過遙聽鐘斷續  
潮迴俯視石嶙峋  
近來欲發逃禪興  
肯許攢眉問酒頻

過清淨菴四首

選一

古木勢參天  
頻經戰伐年  
佛慈能保物

甲寅之後湖南喬木殆盡此山

竹樹以勢家護持得免僧老自知禪城郭疎鐘外樵蕪落照邊行  
來剛數里不信此山川

喜程抑庵再自臨武至衡陽使之長沙次見懷韵  
心未能降髮已絲再逢聊補十年離尊前勝絕還如夢

局外神遊最可思桂權陰濃停柳岸筍輿香遠度荷池

臨武至衡州長沙才子沉淪地此去寧無弔古悲

程兼水陸輓淡牧旻公四首

默默津亭別知君現慧心曾將永訣恨預作隔年淡道

在干江月魂歸一院陰夢中猶握手依舊短長吟

遁跡主蓮社招朋似遠公更能寬戒律不使酒杯空妙

相歸靈鷲慈光繞梵宮一生勤牧力水牯任西東

去住君何碍慚余學未成自知叅解脫誰為說無生講

席餘花影禪床空竹聲衡山如踐約隻履認分明

三十年知己寧無宿世因爾今離殼漏吾亦渡迷津廣

莫瀕停杖長空好結隣但能真見性觸處便相親

送阮允修先生

漸與灘江近文身俗可嘆踢歌奔峒婦椎結擁徭官秋

到天無雁冬溪谷有蘭攝生殊足羨蕙苴供盤飧

客衡陽送汪子碩遊粵東

秋來風雨客愁多君又分携更若何一路灘聲如濕落

半谿帆影似雲過美人塚尚遺花草使者祠應覆薜蘿

寄語羅浮仙蝶蛺欲煩引夢到巖阿

新者居牙卷二第  
九  
八月書報恂令兄

洞庭風黑波浪起龍潛蛟遯凡魚死君山帝女夜悲號  
湘水忠魂髮怒指莽莽乾坤未有光敢將寸鐵耀鋒鏃  
不分魍魎雜爲伍誰辨星辰彗與長獨鶴翱翔九天上  
丹砂忽墮千齡喪羅洋日落無人登鬼火如焚英氣壯

哭呂恂令兄五首

一代佳公子風流我輩師奇文神鬼忌遺命友生知求  
達因娛母安貧欲濟時淒涼聞訃日腸斷不勝悲

已已論交後忘形恰十年事難憑夢兆

恂兄爲余說夢  
有終通之兆

愁總寄詩篇佞佛慈心切酬知俠氣偏九龍他日過不  
忍聽啼鵲

昨歲重陽後分携羽士宮如何千古恨不出一年中試  
刃防人識揮毫喜自工臨行題便面從此敢揚風

哭君君不見君豈不憐吾月夜魂應到天涯客未孤夢

中愁易盡醉後淚常枯偶爾成痴想傳來訃似誣

作賦金山者

阮謂小

胡爲先

去聲

父行掌珠泉路得腹笥玉

樓傾不竭生平力誰傳死後名雁峯高處望嗚咽淚縱  
橫

外山首... 父... 掌... 泉... 破... 王

... 天... 客... 水... 外... 中... 始

趙吉士

字天羽號恒夫休寧東鄉舊墅人登順治辛卯賢書宰山右之交城勦交山巨寇擒斬渠魁百餘招撫三千餘人上功擢農部出權楊關大

司農薦修鹽法考漕運志

御試授戶垣剛直敢言事以勘河去官已而特旨起用浮沉一職國學中淡如也束髮好著述知交

徧四海凡片稿相投莫不倒屣雖遠寄數千里外亦解素酬答之晚寓京師之寄園仰屋高吟一

韻疊至于五百律離奇變化無一語複者嘗從容

語客曰無日不詩無詩不樂余之謂矣有萬青閣

寄園寄所寄續表忠記諸書行于世又自以生長

漸江而占籍錢塘自署為漸岸羈人云

擬古

鸞鳩投枋榆鴻鵠翔冥漠分量相懸殊意志各有託橫

琴修竹廬觀書亦崖畧因之念古人高風宛如昨俯仰

多曠襄天地一郭廓

花繁貴未開月朗貴未望游觀須及時平生屐幾兩是

以達者流卓識定所向潛志絕垢氛清虛得退暢結廬  
林樾間雲霞冠青嶂物我兩忘情終世鮮骯髒  
逝川無緩流風林渺靜枝歸鳥棲莫定游鱗時復疑驚  
望縱烟駕山川發靜思欲乘扶搖翰寧同鷄鶩悲濛汜  
暗相迫萬象自推移彭涓期未來仰見浮雲馳

贈吳田吳慎先

人不得其真舉動多踉跄所以古達人任天無羈束我  
獨重吳公本來輕寵辱數畝傍清溪分種秫與粟戶外  
橘柚香窗中巒岫綠叩扉素心人一尊醉醺醪安居無  
所營澹者乃知足

瑯源山

平明登山巔雲散衆峰見蘿薜蔓前岡松檜列平巘幽  
禽高下飛好音逐時變採茶童叟忙笋蕨充饗膳靜觀

多會心豈必盛游宴勞人息塵鞅永懷高士傳

昔避亂瑯源即

作結廬想越二十六年而先嚴慈卜葬其地可知一山  
一水皆有夙緣人心之萌亦神物動之耶偶尋舊稿因  
存此詩

柯城客樓坐雪

玉塵屑萬斛空界生寒香凍烟不出戶鬱鬱自昏黃庭  
柯有殊態衆鳥飛不翔動蟄同一肅江海空茫茫夜作  
樓月觀天半峨眉光

趙姬墓

有序

廣陵趙姬聰慧曉音律善琵琶拍西蜀瞿公守

三衢納之舟中見溪流清冽喜曰淳泓若斯邇  
關所無命侍兒挹水於盤照以自怡者久之觀  
山巒聳秀以爲維楊梅花嶺部婁耳年未滿十  
八亡于署太守自撰墓碑葬城北鹿鳴山側余  
偕書乘道南秋遠三同門低回隴畔爲詩弔之  
步出城北門空翠遠相擷漸近鹿鳴岫雲霞互明滅青  
塚瘞紅顏舞衫化飛蝶山川有夙緣心目自怡悅照影  
半含愁中懷託霜雪纖手弄琵琶一曲流泉咽歡愛能  
幾時人與絃俱絕香魂不可招荒隧風凄切孤月照杜  
鵑空山夜啼血

巖山前登眺

宿靄捲晴空松飈沁心耳石門隔塵氛谷聲追杖履白  
浪翻長汀蒼翠擁舊市魴鯉振采鱗溪光盪羅綺雲幔  
覆霞城儼然新壁壘小小丘壑奇矚覽時徙倚迴景嵐  
烟沉天白翔陽紫

叢蘿夾路深清聲砭俗耳伸脚絕束鞵誰度彭澤履急  
溜激高舂稔穉成小市古塔摩曾穹半空散霞綺石溪  
勢迴縈列岫排軍壘苔蘚繡荒臯翠屏恣攀倚虛烟出  
水南暝色變蒼紫

南望湖

雲與水同光羃屨失遠岫岸柳澹於烟無山亦自秀急  
湍飛作雨激浪駭雷吼天地入冥濛南北分濁溜澤藪

昔原田萬頃草叢茂獵騎任馳驅發矢噓狡獸羈客立  
斜陽西風冷衣袖

### 釣臺

盤旋上山椒立僻攬空翠掃苔得清陰衆鳥靜不避磊  
柯千丈松狂奴儼相值朗朗客星懸豈復攫世累物色  
備安車三反乃一至公孤且不榮菜傭笑益字千秋一  
釣竿烟波愜所寄笑彼往來舟紛紛競名利

### 黃河崖失道贈蓼庄馮老

循河數十里晨夕未饜殮馬疲不復策間道來孤村微  
軀亦何堪曲肱憩頽垣蒼黃失盥櫛踵息斂心魂秋風  
捲林葉疑是鬪鬪喧老翁來問訊爲我啓柴門門前五

童稚遶膝皆其孫大兒稍識字小兒事橐鞬餬口閩與  
粵二載別家園今歲更苦旱隴畝黍不蕃且言徒四壁  
無力倒一樽慙慙具糠覈瓦缶煮菜根造次別爾去敢  
忘一飯恩

### 泰安道中三首

曲徑開深林泉聲出暗谷巖虛結雲根練直瀉山腹白  
日起扶桑葱青辨樸檄俊鶻攬身起雄飛更雌伏動止  
愜所適不受樊籠畜吁嗟行役子短轅空局促  
清曉渡柴關雲石互爲一萬景含朝暎烟鬟淨逾碧仄  
嶺旣欽崎遠崖亦峭律瀑布濺虬柯猿獮擲拳栗伏式  
未移時回首衆峰失落葉墮我懷秋林澹蕭瑟曾聞稷

丘君黃冠古仙客安得從之游捫蘿探玉冊  
清秋景色佳山行殊不惡萬點青芙蓉突岬勢參錯一  
一摩穹蒼危嶂懸欲落亂蛩鳴樹根重泉注陰壑入耳  
無凡響心澹屏憂樂茅宇倚巉巖松楸作帷幕樵牧烟  
中語忘機遊渾噩總駕起踟躕朗吟謝公作山鬼嘯天  
風客子衣裳薄

望岱

兩日泰安道平陸不復覩昇輿山麓間小憩種瓜圃棗  
實如丹砂旅行恣所取矯首面岱宗青冥挿天柱縹緲  
秦觀峰日月精華吐中有萬古雲崇朝瀾齊魯遙聞瀑  
布喧聲怒若鬪虎歌頌紀徂徠升封禪梁父諸山豈不

尊羅列成部伍無字碑可捫干霄栢難數何時傍碧空  
摩崖弔漢武

查秦望赴補黔中訪予廣陵賦此贈別並慰令兄

匡來于關外

癸卯八月秋函也自北至予時客廣陵形神正鷓鴣驚  
喜故人來縱譚天下事遠任羅施疆予兄未附驥秦望與家

伯兄又呂同時謁選秦望奉部檄先補黔中呼童具盤食綢繆花前醉將騁

萬里程此會良不易君今至貴陽開府掌奏記未是老  
穆生亦荷醴酒賜水西一戰收牛刀且暫試何分土與  
流均之勞撫字伊予倦遊客漫滅懷中刺颯颯鬢毛蒼  
歲月銷壯志令兄數往還一見一揮淚關外苦風霜欲

歸願未遂愛者力莫助親昵半睚眦雙珠畱故園英英  
頭角异周戚無多人受託敢言累兄弟各天涯何時共  
姜被

題逋園詩

高蹈一潛夫賦詩自怡悅皎若孤山梅其味最清冽展  
卷生光芒天地大文泄盤盤方幅間望之有凹凸咫尺  
雲烟離恍疑登九折放眼閱滄桑萬籟皆澄澈悲歌慨  
以慷一讀一擊節雖雖鸞鳳鳴春山罷啼鴉

寄懷胡道南

珠巖蠹海中寶氣遙相望百雉臨雙湖一色清波漾移  
家三十年威質不復讓計偕共赴燕兩月奔塵埃僧舍

分禪燈匡床聯紙帳師門止七人聲名俱相抗方子最

少年與公並臚唱

月江與道南同捷

賤子安足論朱張亦見放

朱啓莊張書乘爲浙名宿

大文出緝溪天下尊宗匠遊嶽過敝廬躡

展尋山嶂秋月澹林端乘興浮夜舫

癸巳過舊墅同遊白嶽浮槎晚歸

富貴各乘時緬懷此清況

五贈詩

王子箕紹隆

萬綠化蒼黃涼颼肅林樾羣卉不再榮菁英亦已竭王  
生蘭桂姿經秋獨秀發孤根托淡巖清芬何醇醇未組  
思投簪寧肯事干謁遊燕不多時行踪滯吳越清嘯見  
天真煩言不如訥忽聽西風起願採徑山蕨曉閣聽烟

鐘夜窗看松月揮手謝吾曹暫時棲巖窟

孫古隍錄

峭固應笑鵬鷺本不如鶚同生天地間氣類殊厚薄孫子秀州彥高文傳六幕公等安在哉今日見巖樂囊錐早脫穎匣鐔尙歛鑄臚唱歷五春未得縻好爵俯仰心易苦徒爲世網縛蔓草緣高岡蒼松盤大壑世俗較崇卑邨知異所託雲流天局幻事事分今昨乘時自有因相對談廓落

戴山民弘烈

皖國尊二何龍眠傳三李千年彈指間吾子乃秀峙杵白定交初辨論亦鋒起投分兩心合澹然同乳水始貴

阮嗣宗一生絕訾毀同學曜朱軒子今尚蓬累帝絃罔不羅棄爾如敝屣譬彼江海崖鳧雁任來止咄哉公孫弘四十猶牧豕

邵子峻昆嶽

東陵有賢裔卜宅舜江灣遭時奮長翅一鳴振區寰飲酒不在酒長嘯破愁顏慷慨重然諾屢空無寒慳彼志溫飽者何以投鉅艱腐儒過拘束老子樂癡頑不若工嘲謔傲睨天地間氣體自高妙豈必儔揚班

吳星子軫

闕閱本延陵軫也名臣後苦貧機杼忙聲聲徹宵晝犢鼻掛中庭何羨北阮富起家百粵中萬里恣馳驟好鳥

不在山良馬不戀廐嗟彼膏粱子華廡徒困守需次赴  
南曹泥滓日奔走意氣橫飛揚清言發吾覆

過獻縣單家橋

經時苦積雨康莊殫爲河籬落胥苻藻舩舫走叢柯蛟  
龍出木末馬牛沒碾渦漁師收網罟乘輶拾蛤螺老農  
荷鋤泣織婦夜停梭冬寒且勿顧近秋已無禾縣吏持  
符至寧肯緩催科傷心江南客揮涕渡滹沱

丙午首夏雨過新嶺

行行近故山登躡亦已熟颯然涼風生空濛萬象伏猛  
雨成波濤倏忽滿陵谷本是山間行翻疑水次宿頃刻  
天宇開蒼黃觸我目此身已百盤猶在峰之麓崖崩半

空嵌輿人偏投足峭壁絕飛禽嵐光繞石屋回顧攀捫  
處但見千章木積陰生夏寒炎景頓蕭蕭猿鶴聞無言  
天籟發幽獨

銷夏齊雲山嶽半山房

穿林陟丹崖蒼翠滴人袖夾路響清湍幽篁暗白晝雲  
癡助石頑泉咽添松瘦引領望天門濃綠接烟岫嶺畔  
嘯孫登時聞鈞天奏

戊申重九遊石壁 有序

雁飛露下木落霜高喜菊英之可餐製萸囊以  
爲佩山名石壁薜蘿長帶秋容法演龍潭鳩鴿  
皆爲靈鳥緝殿創興於大魏甘露三降於元和

新者居邪名 恒八  
陶令非吾聊復折腰五斗孟嘉君輩何妨落帽  
重陽不敢此日獨醒試問明年誰健黃花綠酒  
幸無風雨滿城碧樹青山惟有烟霞入座敢負  
登高之約還期擲地之章

出郭無多路山行從此起巉巖出樹杪清泉近杖履曲  
磴天半懸鳥道纔容趾諸峰各有奇石壁獨秀峙谷轉  
聞鐘聲香林望如咫尺寺門爲我開諸生出倒屣析疑紅  
樹中文章共山水世傳高氏碑臥讀荆榛裏坐石掃莓  
苔烹泉試菊蘂我有看山癖屢遊還屢止到此恰重陽  
嘉會偶然美龍山始何年石壁亦名龍山虛名動遊子回看向  
所歷空青不可擬馬跡逐秋陰依然到城市携得落霞

歸山月來窗几

曲阜謁林廟

有序

過汶上單騎謁孔林夜及城曲阜令見朝如林  
贊者六人贊恭甚予自顧蒙茸敝裘殊愧遽就  
位贊拜畢復請謁廟予以倉猝未具禮辭贊者  
曰是禮也出林進城北里許遂謁廟歸麗倍他  
廟曲阜公朝衣冠先在襴衫執事數十人雍肅  
成列鐘鼓笙竽籩豆尊彝之屬陳且備製亦極  
古予大踈踏復以蒙茸主釋菜禮畢與曲阜公  
及諸在廟者晉接杏壇間則又旅酬酢信宿過  
舞雩下曲阜公又在餽贐碑誌種種乃別至鄒

界更治餐曲阜固世官今令爲震浮公官已三十餘年嚴敬謙慎諸聖裔服之觀其人真無忝聖裔者第予謁林意雖誠顧體貌草草幾于越人適章甫也嗟乎禮樂旣亡經徒咕嗶不遊聖門又焉知周禮猶在聖人之子孫穆然趨步如此哉回首林光雲開青碧敬思莫謾詩不盡言因詳紀其事並識我媿云時癸丑冬日

西周懃狐盡東家萬古存義昊陵雖遠曾無一子孫伏

少昊陵俱在曲阜嶧山千仞高洙水見真源松柏夾道立孤直

不可捫其下絕寸棘神著蟠靈根蒼檜無生死秦火安能燔淡林蔽白日避巢鳥不喧小子瞻拜晚俯仰肅心

魂澗芷一昭忠頌聖歸無言

曲阜世令尹肅我奠宮墻宰牲列桂醑尊彝韞古光趨  
踏雲初胄古壁響絲簧敝裘慚執鬯陪祭儼冠裳哲配  
左右列袞繡坐素王顧瞻東西廡諸儒首左育旣拜聖  
人墓又登聖人堂欣展還踟躕對越轉彷徨

山 甲寅飄泊宣城過敬亭山拜姜如農先生墓追憶

明季昔板蕩讒諂秉國均飄風振枯落舉世同秋旻蒼

然松與栢挺出東海濱慷慨搖白筆直言批逆鱗萬死  
去廷尉投戍宣城雲大廈久矣頽君恩留此身終始三  
十祀不忍歸丘園沒齒有遺囑埋骨宛陵原梅福之會

稽梁鴻春吳門千載不復反高風繼隱淪垂髻憶疇昔  
謬廁坐下賓曲江奇小友曰此伊何人天馬來渥窪逸  
足必絕塵青春去如駛跼踖徒負轅回首真州路寤寐  
慚笑言喪亂起吾里崎嶇敬亭間孤墳鬱道周宿草離  
離寒再拜增欷歔丰神猶可攀浮雲蕩秋飈萬古愁蒼  
山  
江上有見時赴皖想倡亂者  
漁舟逐浪翻遊鱗波中躍咫尺共洪濤誰甘受束縛無  
端截網罟神魚亦落魄魚於人何讎頃刻分憂樂揮刀  
割素髻縱橫恣一嚼江深蛟龍潛豈盡填欲壑殘忍天  
所怒往往見誅搏快意能幾時哀爾徒作惡

下邳行

滄江豈無崖黃河亦有畔  
泓流徐邳間茫然不見岸  
非泗亦非濉滙成溟與瀚  
噴薄浪花中包幕聯清漢  
沃日復蕩雲覆奩天爲幔  
放眼川原失千村歸森漫  
凡予舟所經其下多里閤  
旣防屋角撐又悖樹枝絆  
檣槩全無用高下任湍悍  
所恃只一帆迅行如流彈  
俄頃兩三程長波未及半  
龍舞大魚騰遙空絕羽翰  
誰揮魯陽戈忽爾驚日肝  
奔濤無停時柁師方寸亂  
履險道心生跌坐窮水觀

天闕倡和

有序

范子若思叢子祗公馮子玉持汪子符尹王子

雪園爲家選君玉峰所拔士丁巳冬招遊牛首  
天同金容門人李子介蕃孫子蔣如欽含虛閣留  
題

晨發城南闡遂及江之滸霧餘出新煙宿蘆覆舊雨峰  
明翠漸微了了過邨塢靈籟起淡松夾道蒼虬舞仰看  
氣蔚藍清磬空天宇我心獨無營山水恣所取佳遊不  
待招況多賢地主  
臨險竟忘疲履自刊其齒浮屠蠹蒼穹雙峰天半峙方  
鍾差比肩三山部婁耳晉殿化塵埃齊梁成廢壘俯視  
南北分止一衣帶水誰從伯氏遊徐行七弟子延我飲  
含虛日暮千林紫

遊泰山八首

有序

五過泰山未嘗一登舊有望岱詩想像天際而  
已庚申冬仲叱馭南行次奉高李使君梅友爲  
地主肩輿旣具遂登焉身在雲中心搖星漢疇  
昔所望似乎全嶽在目今之旣登反不知所爲  
嶽矣無垠浩攬當何會歸古之真人乘雲氣騎  
日月吾求其意乎心目所及得韻語八章視李  
供奉若或益之非多也以詩記嶽亦記吾意也  
如曰小天下則吾未敢

嶽勢乘剛風一氣趨百靈舉衣籥浮雲乃覺扶輿輕絕  
巘凌象緯側看星河傾萬峰青不斷顧盼相逢迎籃輿

上曲折厓繞四肩橫去麓如下界殘月吹天聲  
海波眼底翻低天一半赤朝暎萬景含虛空日氣射層  
冰織水簾古雪陰巖積倏忽長風生雲奔松絡繹礧礧  
石欲飛蒼藤牽斷壁神哉造化根何年巨靈擘  
濃澹氣色殊勝處得其槩齊大鄒魯小放眼縱無礙嵌  
空石丈奇突兀青霞內迴環勢萬端離立仍相對瀑布  
結寒玉聲靜光破碎松枯栢已秃婆娑是何代

直上四十里迥豁嘯天門五嶽宗泰岱丈人乃獨尊傲  
徠不敢傲鳧嶧皆其孫匹練遠難見五松久不存尚餘  
東西觀平臨秦越吞  
摩崖矗穹蒼開元天子置小篆取八分真得籀斯意玉

檢瘞山巔登封七十二鷓尾曳天書君相互作僞祖龍  
若先知空碑無一字

黃帝乘龍至青角振嗟峨大舜東巡狩羣聞卿雲歌軒  
虞兩不作三代亦易過秦封與漢時茫茫付烟蘿騎鹿  
逼霄漢我欲挽天河  
縹緲碧霞君鸞笙吹玉宇盼蠻奔寰區投金亦獻紵青  
帝不在岱城南設鐘簾悽愴蒿里下啾啾鬼夜語徘徊  
王迹熄明堂竄鳥鼠  
至今無有此風流  
日晡下山椒俯矚已暈眩山靈護我歸脚下雲片片晴  
雨共一時汶河呈白練嘯嶺伊何人猿鶴如相餞出入  
洪濛中鳥道無一線投憩當昏鐘方寸嶽萬變

共驚平山堂次韻  
地脉通岷峨崇岡起天半繚城抱如屏瞰野峙若案隋  
宮竟何有陵谷變昏且獨有六一翁歷久聲施爛古堂  
廢復興丹蘄開榛蔓至今觴詠地風流永不斷政事與  
文章可知兩無畔我來訪遺跡長嘯冠屨屻看山凭危  
欄集客啓高閉詎云仕學優寸陰分緡筭編摩念先澤  
真淳風未散追和平山篇敢辭語蕪亂淵源幸可師物  
我希同患剗入龍蛇壁古今齊偉觀

寄園八咏次慈谿王白民韻

綠陰淡處

萬綠陰林廬岡巒橫若帶虛空延白光方牀環烟靄素

纔旋乳花琴聲靜三籟讀易愛龍潛登朝慚風颯出處  
敢違時正當以意會

叢桂小山

玲瓏結雲根晴霞觸石起品題得奇章當門勤仰止巖  
罅粲苔紋吾丈在水浹花叢霧雨淡破青扈籬芷桂樹  
詠幽人文心何麗綺

曲澗

輓轡通水脉石沼瀄渟澄一瀉哀湍沸游儵澈澈升蒲  
菼夾碕岸瓊觴浮未曾清泚花外轉碧洗烟光凝鴉鵲  
趁人噪休咎總無徵

超臺

卉木方駁蔓陰森面面齊  
文禽聲韻頰頰拂檻嫩雛低  
展席平臺上譚龍忘簪珪  
山腰橫石砌童穉歡扶携  
廚烟增晚翠浮沉任鳧鷖

舟居

巖溜激清流周遭畫舫屋  
聲欬絕不聞何異逃僻谷  
四遊若舟行虛空本無觸  
列岫引遙青憑欄杰靜矚  
雲水圓互淡延蘿剪叢竹

獨倚樓

巋然獨此存山容呈妝靚  
湯谷鎔爛銀朱輪曜藻景  
花光散石林泉琴發聲永  
雙闕紫霞連層峰何炳炳  
酒醅客停驂夜遊燭可秉

鶴臯

槐榆夾舊路布葉放繁陰  
臯禽翔天步崑閩揚好音  
師曠奏清徵玉羽展烟岑  
丘壑費經營疏鑿亦難任  
紅橋跨石澗數過薜蘿深

拄笏軒

拄頰致西爽蒼陂路逶迤  
交流浸玉砌白間綠低垂  
仰慚獻替少空自步青規  
碁翻松下局酒賭囊中詩  
雲行天局幻昂首驗星旗

人家少宰集香林亭看花  
作詩遠寄次韻寄正  
百卉更鮮妍英蕤簇香路  
天容麗且溫脫幘憩嘉樹  
芳徑綠茵鋪嬌鶯時一呼  
灣環步徙倚紅素霏花霧  
緘縛

漸紛敷游侶屐幾度朱檻護金鈴繁叢安可數  
新榮散林纈現晚鳥盤迴芬葩將旖旎盈堦雜綺苔光  
風入簾幕數辦落淡杯曾雛迎修檻梵天出瘦孩花事  
何曾了暗香泛土垓千苞含錦繡丰神賞未開

禪扉偶憩次家少宰韻

憇寂絕囂聲虛牕延澹白陽旭麗雕甍清陰蔭階碧京  
園草樹荒安問平泉石遙憶諸同遊宗人誰在席花繁  
蔓不分新妍媚舊客別我支公牀坦坦行無路

烟霽花光歛屐齒穿香臺淨梵供諸天搯搗響法雷萬  
青園禪榻茗椀共追陪暫爾辭簪紱高脫輿幽哉遠念  
羈棲子詩箋寄驛梅酬唱恣紉繹半醉愁空壘

登妙光閣次家少宰韻

澹然天宇濶翠靄散喧風盤旋幾曲上精藍縹緲中繁  
英飛雜樹歷亂縈簾櫳阡陌圍繡綺紅碧粲晴空雲樹  
互叅錯烟景正冲融西望山環牖萬堞綠蔥蔥  
丈夫志桑弧胡能跼閭閻奮目天之南凌風矯翅翼忽  
聽山鷓鴣聲聲行不得摘星賦危樓文豪嗣楊億宮樹  
挿空青憑欄睠宸極爨烟萬屋齊振衣聊一陟

古城溪漲觀捕魚有感

萬山昨夜奔新雨連天走谷無行路我從鵝峰過水南

山有鵝峰水漲  
為必由之路

寺僧搖手戒無渡漁家意得蕩波濤綠  
篔簹青笠弄輕篙迴旋不避陽侯怒設網提綱縱橫操貪

心乃異一罟集秃尾槎頭出復入小舸大舸橫截流鼉  
鼉駭散蛟龍泣魚兮魚兮奈爾何揚鬣不得寧洪波朱  
門會食恣厭飫金刀細膾香調和五侯之鯖天下無豈  
知道路多餓夫隋未越國汪公華保據六州治兵此山  
因名古城溪環山下通三浙即漸江也  
癸巳夏五山落巨石成潭潭深不掩鱗予築蘭若干其  
上禁網釣為放生所魚樂此潭不與水俱逝遊人投食  
各以類鼓波吹沫相爭吞今成勝景無  
復有捕之者矣此詩作于壬辰附記

贈吳文仲鼓琴歌

剪燭樓頭拂朱絃古懷漠漠意悠然初疑泉溜響山谷  
泠泠咽石松風前更疑哀鴻鳴哽哽江天斷續平沙影  
簾靜香細茗椀清流水高山艷俗屏君不見岐王座上  
瑤柱橫彈罷秦聲變楚聲又不見華陽亭下月三更中

散調曲鬼來評梨花梅花夜窗白座中誰是傷心客

癸卯冬偕張青瑠章含可孫古隍赴查王望給諫

召座懸顧見山退谷圖同席各賦長句寄意並

呈給諫公

黃塵盡日吹燕市入戶陰森淨窗几雲間墨妙具奇觀  
烟樹蒼茫尺有咫天地大文在丘壑五日十日恣冥索  
有無點染盡天真開闢如同鬼斧鑿昨宵夢遊入退谷  
層巒歷歷留心目忽爾披圖見此山依然素練排林麓  
蒼苔引綠上松根大小虬龍舞石門懸崖飛瀑浮空出  
天際寒聲落諫垣在垣者誰查諫議太息虎頭不得意  
唾壺缺盡酒杯寒墨花灑灑飛空翠

柳敬亭說書歌

少時學書記姓氏十五亡命盱眙市江南古調盡淪亡  
獨解舍商與咀徵壯年師事莫先生詼嘲一座盡爲傾  
南寧幕間稱上客掉舌抵掌擅縱橫憶昔重兵屯江滸  
長揖軍前說左杜箕踞高會任滑稽公喜公怒短王簿  
滄桑既更隱吳門河懸三寸向誰論空餘說劍丹青在  
相對欬歔念舊恩作傳梅村吳太史天下爭傳柳翁事  
莫輕柳翁徒說書古人至今賴不死登壇拄頰動人聽  
詹詹炎炎不肖停玉尺一聲天地肅笑啼無主形神冥  
吁嗟乎柳翁胸中網羅靡不有賢奸鬼怪供奔走宛若  
兒女話房櫳倏爾虎豹空山吼忽如黃河怒濤千里奔  
排山倒海天爲昏又似孤舟夜半風雨喧隔林落葉啼  
清猿五官七情一時觸騰口嘖嘖吐珠玉千百化身寸  
舌傳哀樂窮通與榮辱吁嗟乎柳翁精神充斥文字外  
造物蒼茫那可繪

都門苦熱喜雨懷朱霽三恒陽道中兼慰潘雲從

燕山三伏行人苦鑠石流金日當午黑雲膚合雨滂沱  
江海魚龍落牖戶此時朱子正驅車荒原百里無塵土  
愁予偃蹇客招提跣足科頭守環堵憶從君坐識安仁  
古道相期傾肺腑結交寧必貴黃金一見欣然投縞紵  
莫傷遲暮歸田廬釋褐多年未帶組

題查二瞻秋江晚棹圖贈范眉生

秋光清泛無起止松欹石醉秋光裏遙青空碧有無間  
筆所不到雲烟瀰借此丘壑寫真情賞心今日得范子  
雲間日下會何年邂逅論交始癸巳清言疊疊希阮嵇  
已絕雌黃況苟訾腕中屈宋作衙官何況齊梁但綺靡  
奇文自具天地中山水清音任摩揣一櫂載秋渡江南  
模糊青點金焦峙艷俗盡洗大江流淡泊欲除妻肉累  
惟吾有叔類處冲魏山上下堪比似君家兄弟數周旋  
頭腹尾分龍足擬柳葉殘黃楓半丹園中秋意長如此  
驚看世事數變遷與爾訪菊柴桑里

課耕秦郵短歌

曉起出邗關日暮秦郵曲青畦傍水開稻芽半抽綠薄

田數頃隔東湖棄置十載荒溝塗滿眼茶蓼燒痕沒年  
年輸稅償官逋生來未讀免園冊偶治生產尋阡陌呼  
童飲犢過南陂箬笠蒙頭披襤襖召我老農鑿新土胼  
手胝足日當午面圃構屋不暇歸抱甕占星忘其苦忘  
其苦樂爾軀昔無袴今有襦紫芒赤穢收亞旅紅鮮白  
粲歡妻孥田祖賽罷塲功畢豚酒相勞歌嗚嗚君不見  
陶粟里倚杖田間聽流水又不見徐孺子自食其力唯  
耘耔安得稻梁生鹵瀉太倉之粟皆露積

舟發蕪關泊橫港作

巴山雪釀江南水江水滔滔南國紀綠遍郊垆半楚天  
魚市花村偏麗綺蕭蕭蘆荻漾遙青赤根長浸洪濤裏

蕩舟挽向峽口行盤澗圻岸互嚙齒長夏沂流苦薰颺  
薰南風 颺西風 艤榜安能展汝技予帆高掛飽長風瞬息驚看  
百餘里江豚吹浪立江心沃日浮天無底止雷電响激  
總虛空過眼茫茫何所恃朝發鳩茲午銅陵橫港停橈  
暮山紫六代繁華烟草中千百年來一彈指

登北高峯絕頂 有序

予髫年讀書靈隱五大夫樹下窗對北高峯峯  
半一僧每夜擊板念佛遶山行山有虎余夜讀  
聲高與虎聲念佛聲相隔復跡僧與語則敝垢  
古貌自號桂峰住已三十年視所擊板盡蝕予  
為鑄銅板易之踰夜聲寂寂駭問故則山中一

黑虎聞銅聲驚舐其腓血溢而仆又有黃虎若  
咎黑者擠之去得不死未幾予別去往事夢中  
矣今戊午中秋同李子分虎登韜光翫月忽聞  
念佛聲為憶此北高峯也質明走問桂峰則年  
且八十各嗟道故者久之予既登絕頂復下山  
麓尋五松精舍見桂峰方俯窗下視念佛數聲  
送我響振林谷若蘓門嘯焉因賦長句用李岷  
畱題靈隱寺七虞韻分虎和之明日擇工鏤板  
懸桂峰所居之室

崎磴千盤路曲紆憑凌雲海天為衢龍鳳飛舞不模糊  
畱下西溪作陪都 宋移都鳳凰山 石骨玲瓏鬼斧剗駭

豹蹲獅誰刻，鏤萬嶺迴伏。少樵蘓北臯，高處失浮屠。庚寅  
年華光廟下，走覲巫歲歲。祈蠶集苾芻，宿雲鬢黷嶺畔。  
鋪白衣蒼狗，未可摹巖花。峰葉化魚鳧，半空碧浪翻來。  
無火輪推出，扶桑烏海水。明滅轉天樞，江淡湖白孤山。  
孤濃淡變態，氣色殊飛鳥。下翔後獲趨，俯尋流泉探僧。  
厨重逢老衲，貌更癯。三十年來曾相須，青燈烏几對山。  
嶠書聲佛號，嘯於菟。僧忘乎虎，吾忘吾重話。前因意躄，  
蹶目送山椒。足不踰，嘹嘹清梵空中呼。如聞天樂吹笙  
竽。

題洪谷一督學白雲巖墓廬

山腰細路流潺湲，石欄窈窕花藥攀。雜蔓四垂苔屐滑，  
烟樹蔽虧斷人寰。空堂素壁悲風木，思親甘謝鳩鸞班。  
三秦菁莪歌化雨，陳情菽水舞斑斕。佳城鬱鬱繞叢樾，  
廬墓數載凋朱顏。花迷石徑峰翠駐，寤寐不忍離故山。  
茶鐺藥竈到處有，換杖逐籬獨往還。我亦臨風勤仰止，  
白雲巖際白雲關。

楊柳青舟中金鼓宋施鼎升程奕先家離客分賦

草舍澹春煙，南歸共黯然。平蕪青巨路，垂柳綠勻天。雨  
急波聲碎，帆開岸影遷。白雲頻引眺，迢遞未能前。  
同顧修遠步孔家庄

虛落蒼烟外，人行葦岸西。入南天地狹，望嶽水雲低。酒  
舍喧鵝鷺，漁舟散鷺鷥。重來百感集，夢繞舊沙堤。

招施岬雲北部泛槎文溪

春晴天淺碧花盡蝶蜂閒兩岸鳴叢葦孤城傍小山樵  
歌青藹外棋響綠陰間日落雲光斂重過落石灣

雨過廻龍寺

青藹圍山麓春歸笋蕨肥臨岐迷客屐冒雨扣僧扉獨  
鳥衝烟過層雲帶濕歸淡篁溪路暗野艇出漁磯

清溪訪泊

寒氣依山重溪雲凍不傾板橋舟一葉草閣月初更葦  
折驚鷗夢琴鳴靜水聲遙空蒼莽外指點玉繩橫

曉發遂陽

旅夢驚殘角行人動五更山川同養晦星月互爲明細

草青鞵濕叢篁白露傾翰音茅舍外猶帶夜來聲

玉蘭

辛夷方借質蒼荀漫呼隣太素渾無飾空香自有真籠  
烟寒玉潤濯露雪膚勻別色難分樹冰心早絕塵

送許芳城還潭渡

時芳城著有新安江賦

江流望不極雁陣戰晴沙行李沾雲濕歸帆壓浪斜一  
灣天地合兩岸薜蘿遮潭渡風光好烟簑泛釣槎  
海潮冬復壯寒浪蹴歸舟餞酒紅亭別吟箋白社留霜  
顏披月冷雪意駐雲流江賦惟君續山川資討求

秋日淳安舟行

凄緊蓬窗雨疎聲入夢寒爭灘千楫勇釣石一竿閒曲

岸移城樹飛湍漂屋山萬峰青過眼後欲任躋攀  
溪聲如欲訴流恨幾時窮農畢平疇潤樵勤絕巘空秋  
來况客裏病起又舟中沙際何人任漁家放晚罾  
烟樹蒼茫裏推窗雨過時叢篙方逆折怪石忽橫披  
磔鳥驚起綿蠻鳥自知山川相對峙若爲我舟移  
風波未歷盡晨夕此孤蓬十畝連瓜蔓三家聚葦叢  
雲成縞素空嶂化蒼紅萬象何淵淨無殊靜者衷  
牽纜懸蒼壁林烟一抹橫谿容行屢換雲幔過相迎  
斷靄連山碧流波入漢清秋砧時斷續到耳盡寒聲  
幾曲青溪路村烟出樹新沿河聞土話聯舫約鄉隣  
萬綠山如滌餘紅葉半勻寒蟹催晚泊帶月破烟津

祝程非二四句

十載藏孤憤無慚第一流援琴何用碎懷刺未曾投鬢  
髩追前輩文章出我頭年強不肯仕總爲老親留

戴葭湄爲予寫鏡影索贈

獨擅傳神技謝公弟子行葭湄爲謝文侯高足慚非裴叔則賴有  
顧長康已悟浮生幻空餘故態狂鏡中小影在何處問  
行藏

柯城送任文階還陽羨

竹舍青燈漏未沉夜寒先入旅人衾一簾烟雨難爲別  
千里江雲共此心意盡還聞巖半嘯曲高止作郢中吟  
莫愁我輩長貧賤爨下枯桐有賞音

自南陵至新嶺凡三日余坐篋輿采臣策羸馬山  
川所歷是處成勝漫賦紀事時已亥陽月也

鄉關漸近數歸程愁思還因內顧生夢趁寒鐘尋舊榻  
泉經夜雨換新聲五更燈火催人去十里霜華伴客行  
曉發頻遷村店路一灣烟樹小橋橫

點點烟橫接大荒短策牛背遂聲長隔林溪響千山雨  
近墅梅開十畝霜何處高原封馬鬣幾人岐路泣羊腸  
行逢老衲霜天下猶認當年舊酒狂

過飲吳船茵次索詩卽席賦贈

金臺猶是舊山川適意無妨構數椽非水欲浮張氏屋  
有書長載米家船雖然薊北風塵裏宛在江南水石邊

前輩親朋零落盡不堪對酒話當年

十年游宦老燕山歷盡艱危鬢未斑故國烟波千萬頃  
此中風雨兩三間月涼如水齋疑舫酒熟生香客扣關  
樓閣數聲天欲曙醉中錯喚掉舟還

盧川十景

蒼天遙接最高峰錦列參差畫幾重綠樹隔雲搖翡翠  
丹崖懸日吐芙蓉陽春有脚千村暖桃李無言一路濃  
野服來遊緣問俗休教驚起住山農

錦屏春色

西北龍山積翠幽千崖四序只三秋風生松柏吹人面

露洗藤蘿掛石頭渤海丹書高氏碣

上有高氏碑

延興碧瓦

魏時樓

魏時臺殿

自公多暇心如水愛聽泉聲日夜流

石壁秋容

石壁一名龍山龍潭  
泉在寺北石岩下

片石看書第一山浮屠玉立俯郊關鶴飛遠帶秋雲沒  
鐘靜長留夜月閒色相有情藏舍利虛空無礙出塵寰  
虎頭舊憶金皇統多寶何年落世間 王山寶塔

形勝當城二水交烟嵐如帶護西郊一經問世傳周孔  
百里看山得卦爻月滿清泉龍入定雲連古柏鶴來巢  
高峰便是神仙境何必天台遠結茅 卦岳爻峰

山縣迢遙般若臺曉鐘初動夢初回城頭暗逐天霜落  
枕上虛隨海日來差喜鳴琴清似水不教戍鼓亂如雷  
故園明發溪邊寺縹緲聲中憶早梅 定慧晨鐘

城南日落對烟波曠野村村稼穡多單父不爭夸父御

汾陽何用魯陽戈虹收白水迷官渡鏡壓青山照女蘿  
自是行田春正好秋風惱殺漢人歌 汾陽夕照

蒼生勿復嘆凋枯霖雨猶存晉大夫一邑往來皆井井  
千秋忠孝只區區清泉湧地蛟龍護古木參天日月扶  
出郭停車常再拜多慚飲水不能無 北祠靈井

山谿天險抱崇墉西社雲根積翠封峭壁一聲飛霹靂  
驚泉百道走蛟龍晴空雨灑過眉杖日午寒生仰面松  
却憶呂梁如未鑿孟門何處可朝宗 西社龍門

畫舫新牽傲吏遊城南彷彿鑑湖流河陽夜月通花縣  
王粲春風上酒樓官柳暗窺青海眼女牆晴對碧峰頭  
魚龍從此聞仙梵一片波光照十洲 却月晴波

山雨南來雉堞低，鳩工疊石障迴溪。渾如陶侃貪栽柳，  
不比隋人浪築隄。十里可容春騎歇，三眠仍聽曉鶯啼。  
忍教隣國長爲罅，把酒臨風笑白圭。

臥虹烟柳

楊干寺題壁 有序

爲先慈卜地步，出里門人莫知予。投足何所偶，  
遇羅景明王守之兩老人及僧普聞蘊白恒學。  
輦坦步寺後見程子非二題壁感懷一首

三春無刻是晴天，蔬食芒鞋到處眠。曲曲溪流蒼玉碎，  
離離麥秀碧珠圓。漆燈未熟佳城閉，巖腹將傾石柳懸。  
偶過精廬題壁處，四山烟樹恨無邊。

金山靳王廟

古廟巋然控上遊，雲沈戰艦夕陽收。江烟時帶魚龍氣，  
潮水猶傳鼓角愁。南渡衣冠空半壁，中泠俎豆竟千秋。  
可堪驢背投閒去，長使厓山作帝州。

送同年徐次璆之上黨

長安折柳送行時，執手河梁各賦詩。名士何人堪指屈，  
舊交惟爾是心知。郵亭花發聽春鳥，野店燈昏問酒旗。  
黯黯停雲增悵望，太行山下馬行疲。

渡石壁冷川橋

萬仞凌霄翠色連，中通碧水聽濺濺。田家麥怨三春雨，  
茶市人忙四月天。野渡舟橫淡柳岸，小洲沙接斷橋烟。  
花時行客無停屐，妬殺鴛鴦淺水眠。

新者居牙老 恒廿六  
秋日過金壇拜奠蔣虎臣夫子于西郭上庄揮涕  
之餘感賦

我眉老衲是前身乞食岷江不厭貧二十四年門下士  
八千餘里夢中因殘編斷簡猶傳子舊畝空廬已易隣  
淚灑重泉無限恨那堪砌遶臥荒榛  
共哀楚些問天難蜀國啼魂血未乾遠載空棺來玉壘  
不遺一老在金壇已除諸想無生死寧羨高僧入涅槃  
兩載雲踪成永訣荒林稽首淚闌干

哀新安 有序

新安失守羣盜縱橫人傳寒舍爲燼老父攜家  
淡谷無恙嗟乎處堂賀燕雀得食喧豺狼皆不

足責也豈無任其責者乎詩以志哀

秋風灑淚入南天通國何人見未然長恨繞朝追贈策

淡慚祖述着先鞭予議闔郡團練爲固守計喜亂者百  
梗其議當事亦姑置之予亦安能久

處此土耶半千里內雙遭亂廣饒二郡  
爲亂之倡三十年來兩播遷薄

宦跡奔無長物隨身剩得舊寒氊

列陣誰分鶴與鵝赤眉倡亂任橫戈堪憐六邑摧殘盡

可比饒江殺戮多當日寢謀無汲黯此時克敵少廉頗

懸知父老吞聲走落日空村近若何

揭竿蔽日晝爲昏老父高年亦出奔三載塊苫聯棣萼

一天風雨散鴿原萍踪無計尋家室麥飯何時拜墓門

葬先慈畢  
卽聞饒警茅屋秋淡山路窄兒曹應苦覓饔飧

桐江歌

亂峰無數指青空  
雨店烟村處處同  
幾曲溪流雲四面  
不知身在一舟中

卦山同閻古古陸集生張仁度夏宛來分賦

讀書堂傍古禪龕  
汾水西來繞寺南  
十日不妨河朔飲  
舊年吾已釀霜柑

帝京蹋燈詞 和沈客子韻

狐帽茸裘遊冶郎  
銀瓶索酒醉深坊  
便邀綵妓嬉春去  
閒殺紅爐宛轉房  
香門是處結齋壇  
佛供珍奇掌內官  
過了燒燈看燕九  
天工遮莫做春寒

趙吉士

天羽休寧舊墅人  
再見

山行

山禽野鹿共徘徊  
馬踏層冰絕點埃  
曲徑欲迷尋路轉  
寒峰忽斷覺天開  
夕陽煙裏鐘魚度  
小築溪邊竹柏栽  
應是風塵勞節使  
未能登眺白雲隈

山口曉行

竟是家鄉路  
縈迴歷幾層  
嶺頭籠曉霧  
樹杪見殘星  
泉濺溪玉嵐橫  
一幅屏頓忘行役  
苦緩轡入空青

憶讀書靈隱僧舍

冷泉聲咽瀉哀音  
栽笋楠雲十畝陰  
予移筍窗前山僧  
笑之今竟成林矣  
紙帳布衾遮雨雪  
夜溪虎嘯助高吟  
每夜書聲與虎聲  
相應習以為常

憶寄園春

緜緜新綠早鶯天叢薄香生花未然洗木松間安藥白  
紅橋白石瀉青泉

憶寄園夏

粉蝶花亭亦畫圖百年老樹自扶疎眼前何物開胸臆  
跣足科頭讀漢書

大風雪馬過浮橋幾陷長歌簡李浣廬

時分巡東亮

沂河南來水浩瀚  
沓沓涑冰千壑漫  
波濤傾浴迫霄漢  
雨霰雪雱暗日觀  
沙浦棲鴻林宿鶴  
冰封石竇泉將斷  
颶風颯颯號日旰  
沫跳波馳湍復悍  
崖腹奔頽水齧岸  
大艘橫繫纜欲判  
驂騮不復騁  
蹉腕我據高鞍轡  
難按

近聽驛夫渡頭喚心驚行急無涯畔  
昂頭層山何粲爛

層山在州南蘭桂諸山附之

列岫澄澄耳目換  
武清李君稱廉幹  
分

巡亦足作屏翰萬屋烟光出樵爨  
棗熟繭成樂里閑  
單騎迎我宿公館  
雪滿狐裘泥滿骭  
手皸面皸不及盥  
急向紅爐熾獸炭  
夜淡候胥未敢散  
馬嚼枯萁不解絆

宿青駝寺

積雪埋蒼山空林無剩葉  
凍雲裂復凝泥爛濕行笈  
雉兔任縱橫過客誰射獵  
人語雜溪聲寒裳爭晚涉  
店主認舊賓烹菹來相饁  
呼婦出拜迎襁兒何妥帖  
店主舊會識面  
袖手方苦皸疲馬難振鬣  
遊宦二十年老色上睂  
睫小飲暫開顏霜風戰醉頰

宿遷道中

馬陵山北未桑田愁聽行人說往年千頃平疇翻白浪  
幾家茅屋帶寒烟可憐絲穀無餘種獨有魚鰕不論錢  
今日棹歌聲起處亂帆爭引隔堤船

汶河候熊公久不至憶壬辰公車同胡道南侍御

方月江學士洪谷一督學程奕先及家雍客大

令北上值大風雨會文河畔呂家莊今莊已遠

徙諸公無存者撫今追昔情見乎辭

孤村破驛盡荒榛剩得寒流汶上存三十年來過一世

四千里路走兼旬臥輿抱病愁羈路熊公臥病輿中分席粘題

弔舊人賴有癡頑容後死逡巡沙磧指迷津

集字詩

詩牌共十盤每盤九十字隨手拈一盤限定十韻各以百字成詩

秋前一日雨集寄園舟居

限灑下雅瀉竿把野瓦社者十韻不拘前後

長日無乾響層陰潤繡野松閣扇山風宿霧冷然灑天  
半翻車輪石沉瀑乍瀉覆蕉繫綠簑池面釣竿把舞蓼  
護幽花牽羅網頽瓦雙屐畱柴扉交新憶昔者發興恣  
所向春醅供夏社真賞只淡永匝席添瓊竿快語能解  
醒曠懷存正雅暝砧聲轉繁移榻憩梧下

又即用前盤詩字翻覆成韻復集

蓼閣轉層陰昔霧匝松瓦日暝憶春蘿柴車宿曠野繫  
展憩梧扉長夏賞花社繡池瓊石供釣簑網能把舞扇  
護風輪懷山沉瀑瀉砧聲向榻畱綠竿蕉半灑冷面發

天真繁響恣潤下新語快所解幽興添醒者乍交無翻  
覆永存只淡雅頽然酷正乾移席牽雙竿

又

剩字既成一盤亦可集詩否魯齋曰字中無風  
雲月露安得秋興雨意乎予曰無可生有庶不  
為許洞所困因再集二首盤內剩字無一遺者  
雖勉強牽合貽誚雖重然舍熟就生因險得平  
發我旅嘯真不虛此秋  
兩舟居也諸公其和之

川葭耀絳漢暈圓渺籠野荔關曙暉遮單帆舟上把蜜  
室擁冬暖圍柰漸森灑樵蹤細印岫聊從支許社講圖  
攬芝檢避險愛搜雅健讀拙羞辭欵才耐海瀉美艷招  
眉間肯教姬擲瓦撩裊刻節稀遂怡鍾絃下安厨烹柔  
脂臨飾齊縱竿寥寥乏主盟恐皆鹿聚者

又

以百二十字集成二古每首止餘三十字尚空  
六十字可以游行若以所剩百六十字集成二

古每首雖剩七十字止空二十字難以構思于  
子魯齋可謂獨為其難矣予性不耐思又心雜  
不能苦吟推敲百六融會三章雖不及于子之  
鏤刻然側弁而哦惟意所適間有自然之句亦  
不失吾性情也請  
以質之諸君子

筍班抱蕪隈納睡蕭齋下了了潭波融燒痕沒迥野島  
做魚陣忙雛鷗攪宮瓦迢迢麓為沼牧童認廬社塞北  
易插樞課種茅費把瘦骨怯浸肌目送悲難瀉小沁懸  
漿缸舉籌拾鬣竿鳳管寸寸度敲彈調何雅離緒今多  
少掩袖潛仍灑地潤減烏餐嘆女勞勞者

丁卯清明郊外踏青

有序

雲橫舊路風度層阿百年近在寸心三春又經一月  
芳郊成玉積飛飛柳絮高低綠酒簇霞明處處眼光

上下歸鴉喚起踏沙屢更行  
厨啼鳥驚眠改火時逢  
冷節溪翁荷插步青欲破林  
蘿野老耕莎呼白共分  
農雨掃徑遙臨二仲尋山  
笑帶兩生看天氣初晴輕  
嵐小染奈客懷未洗浮蟻  
早傾燕舍迷家點點淺穿  
淺葉鶯聲過午纖纖半掛  
垂楊亂響聽何多蒼烟疑  
四罩遠望五原斜照草閣  
荒殘誰憐片石佳城松陰  
淡薄寒叢覆翠幾堪花裏  
弄流箏鳳竽搖紅不禁竹  
邊吹艷曲

集序中百八十字得詩六律

選二

時逢百五步緜蘿幾踏晴  
莎喚奈何舊雨染成青草  
路垂楊淡掃白雲阿春耕  
早起烟光簇午吹初橫絮  
酒多洗竿臨流傾綠蟻花  
溪竹舍屢經過天邊紅起  
半城霞野步山尋喚酒家  
輕薄笑看青白眼高低亂  
踏淺淡沙老農過望三春  
雨小徑初分二月花處處  
掃松殘照裏寒光上下罩  
林鴉

宿山寺次韻題壁

浚林霧雨濕禪扉半道羈  
栖老翠微過客時揮歧路  
淚放臣未拂出都衣遊同  
麋鹿交纜息揲及天山遯  
正肥已畢向平婚嫁願寸  
心長與世人違

掛樹歸隱

有序

禁黃已巳正五日從王園復還增壽寺得三兒景行  
一曲尚信鄉思轉淺卽期翼日俶裝南行感賦寫意

一曲高歌獨倚樓  
曠懷安用地埋憂  
青山白屋渾無恙  
紫禁黃扉未可留  
老驥不妨長伏櫪  
飢鷹何幸早離鞲  
推擠正足當針砭  
此日身輕得縱遊

八日新城道中

梅花消息未曾傳  
野燒橫林簇白烟  
歲事尚須占穀日  
吾生那怕值蛇年  
凍皴霜片髭鬚斷  
蹙踏水凌曉腕堅  
轉盼舊遊無一在  
單行偶影踣高天

發漫河四更過景州作

歸臥衡門夢亦欣  
一慵聊補往年勤  
霜披馬首裘茸捲  
月過雲頭樹影分  
石塔光殘流梵放  
銀河響絕貢冰紋  
意行倏忽三千里  
早岸綸巾漸水濱

宿禹城廿里舖

縱轡燕關去又回  
天風時帶市塵來  
屢經舊路嘲殘客  
猶及新春醉臘醅  
時十四日立春  
榭葉晚隨水窖落  
梅花早向火堆催  
負暄偏戀虞淵日  
愁聽寒城畫角哀

平原道中

布衣不復到端門  
白石青泉盡主恩  
雲路往來新雁影  
河流消長舊沙痕  
人從墟落平肩過  
鴉趁行輿背面翻  
猶記呼鷹圍獵日  
兔狐直向棗林奔  
前冬勘河在此打圍

宿晏城驛醉後縱筆

隔林空翠半霏烟  
日出霜消淺碧天  
狗監無勞知姓字  
龍門何處望神仙  
閒拋青瑣尋鄉夢  
醉擁紅爐煖客羶

若使西湖無隱吏清流丹嶂向誰妍

宿張夏

村墟日暮啓荆扉斷靄殘烟送落暉  
羈夢已先春燕去客心猶逐塞鴻飛  
青尊佐膳思鹽豉白恰行歌采蕨薇  
偶值齋日寄語故園猿鶴道蚤邀明月照魚磯

由鎮屏躡蒜峰頂

墮盡深紅絮亂飛上人迎客啓巖扉  
將遷白嶽雙芒履暫作丹徒老布衣  
鸚鵡樹間啼欲咽鱗鯉江上網來肥

西津渡口無閒地孤石空留釣月磯

蘓子瞻詩蒜山幸有閒田地著此無

家一房客今孤峰獨臨江岸田地沒入水中無有存者

城南小築

和王阮亭詹事

真州城南天下稀竹洲花塢歛寒輝  
有時露立餐松木

何事巢棲茹蕨薇赤岸洪濤流瀨瀨  
漫沙冷月白澄澄

沙漫洲土人訛爲紗帽洲華纓金絡無相苦  
從此長林不受鞿

再柬宛來章雲以悉羈人山居逸事

噴岈半是補天餘得此雲林我隱居  
棊几壺傾千日酒松窗月印一床書  
羈單偶憶西園聚高直誰容北海疎  
石浪山光圖畫好逍遙長逝樂濠魚

中秋前二夕對月見一軒高樓作

誰隨老子據南樓貪借蟾光兩夕遊  
清漏頻催銀漢上浩波早逐玉霄流  
展翎仙鶴聲空過冥跡雲鴻爪不留  
花嶼香深人萬里寒砧斷續警邊秋

山樓尋秋感懷

門垂五柳掃沙塵那得柴桑獨抱真鄰舍詠諧頗說鬼

夢鄉迢迢不逢人英餐金蕊原非落菊衰謝而後落英安有可餐之味或

云落始也落英謂始開之花耳閨厄黃楊豈易伸豪氣難除狂態作蘆

中鼓柅暫迴綸

重陽後二日更溪至蓼莊吳古逸先據山樓家蓼

天率諸郎携樽就飲

雁落霜高笛一樓何人清嘯月中遊名花倚檻迎歸客

舊路提壺到隱流持杖將車羣從侍脫簪墮珥醉賓留

芒鞋踏遍燕山路白荻丹楓報晚秋

山中絕不問世務偶有寄邱報以勘河姓字相告

者感而賦此

醉憩花陰睡美餘悠然泉石得香居山樓又樂歸田賦

家圃猶傳種樹書長媿素餐時務拙終慚肉食遠謀疎

冥鴻一去無留爪羞作江湖逐隊魚

禪棲自慰

遯跡荒藍樵牧為伍既無諱忌自絕擠排都中

三不問至有議羈人久不歸里者我已忘世而世不

日日誰我忘將何處托足耶鴻飛冥冥高隱難及予媿

正賦入山不深矣賦此寫意幽真山山賈見會來容

不多諫草媿焚餘久杜柴扉號霧居桑落時傾清濁釀

松滋閑勘典墳書難平積恨簫音怨未報溪讐劍術疎

昨口吞聲憂懼外洋洋長逝更生魚木非對碧霞而  
不野趣

玉佩玲瓏早斷塵橫斜古柏寫幽真山山慣見曾來客  
日日新逢未面人葦白蘆黃楓未赤魂清骨冷與方伸  
三公不入狂奴眼雙石長懸百尺綸

懷桐洲石瀨

有序

予家海陽每就試武林道嚴瀨必綰絳臺下撥  
蘋野薦朗吟山高水長覺羊裘釣絲長留苔磴  
蘚石間先生清風萬古真足廉頑立懦光武少  
與先生遊及卽位白頭故人乃以諫議屈之其  
日咄咄子陵又曰吾竟不能下汝亦早知先生

不爲之用矣懷仁輔義自不阿諛順旨先生樂  
隱之心已決于變姓名之日非其君不事非其  
友不友宜其一來遽返也予宦遊卅載竟至放  
歸異日綠簑烟浪肅拜祠前得無汗背泚顙乎  
兒景行郵呈登釣壇詩心有所觸賦此寄正先  
生以代一奠

七里灘聲浣俗塵瓣香低首景高真披裘傲睨無天子  
撫腹溫存有故人箕踞空牀猶熟視胼胝老足已雙伸  
眼寬世窄層臺上簸弄烟波穩把綸

山中聞名用報歸里俶裝感懷

丘壑閒緣嘯咏餘烟簑雨屐別蓬居治裝懶攬登車轡

解薛愁看勸駕書遺牘方深知已感行鑣又向好山疎  
仲長園閉終難臥慚愧于今到烏魚

別吳古逸

奕賢酒聖兩無論碩果難留百一存孤酌還山尋阿姥

晚年歸楚報王孫

古逸原籍淮陰

遠行熊館踰千里近祝豚蹄

酒半樽却羨吳公漁牧伴酣歌爛醉臥花墩

裝已束矣止菴方石和尙鶴夢羽士來餞山麓憮

然有賦

瀟灑閒身得劇論長垂法戒寸編存息慈淨室尊林遠  
長嘯蘇門會阮孫蘭若敲魚勤放梵香光浮蟻靜傳樽  
買山無地難克隱悔別花巖錦繡墩

咏柳

曉來折贈起征塵宮女蛾眉畫不真多少柔絲縈恨意  
萬千長縷縮愁人迷離輕縠波紋縐婀娜纖腰舞態伸  
飛絮毳鋪飄泊慣濛濛荒浦撲垂綸

懷海陽萬青閣

不厭簞瓢樂有餘荒村終老閉門居聖賢清濁黃蘆酒  
丹墨縱橫鄴架書翠竹白沙腸半繞朱櫻綠笋味全疎  
無溪到眼聲先到籬落懸罾禁打魚

春日出西便門住萬安禪院題壁

苔階幾曲淨無塵石谷長羈隱是真誰道蓬茅終斷客  
止慚猿鶴不留人壺傾竹葉逡巡酌草綠裙腰次第伸

田父招邀頻致款坐移岸脇理殘綸  
讀羊山馬長逸高隱手書賦此簡報因懷山間歿

存諸子

斷續溪聲名客論青青山色六朝存傳經豈讓韋長孺  
定樂真同祖孝孫帶雨鋤泥新種竹臨池聽瀑更移樽  
桔槔不斷千巖響方外清談老謝墩

夏午李子南枝訪我京園因下榻焉長安米貴正

不易居促駕入晉幕贈行

驛路長驅撲面塵心情冷落却能真漁樵隊裏容遷客  
大小山中別主人南枝由皖城終撫軍幕中來詩不斷吟隨意寫狂  
何妨瘦老懷伸勞勞底事來燕市浮玉湖心失釣綸

黃鼎延

字爾德號新洲休寧居安人幼攻舉子業爲士林僑居謁選得州司馬願終養不仕喜交游重然諾身歷名山川嘯咏殆徧慷慨任俠所至有聲詩出心裁不拘拘擬古而古意自合辭謂得山川之助云

采石渡江

陌頭楊柳笑春風偏管離人思不窮江渚蒹葭洲已綠  
海濱潮汛日初紅詞人捉月留奇蹟戰將登磯著上功  
指顧青萍光射斗揚帆北渡氣如虹

一筆滁陽道中

旅宿南譙夜朝來履薄霜環滁山色好一記憶歐陽古  
幹梅仍在名泉水自香停鞭懷古處鳥語聽笙簧

春暮

信今集

醉月亭詩

去鄉今幾日長道馬行遲山淨寒煙起風輕弱柳垂蜻  
蜓浮水面蛺蝶戀花枝觀此思何限春光那可追

一望關山矗碧天飛樓縹緲踞高巔吞吳肯令成三國  
障蜀寧甘限兩川鄴下才名輕魏武江東事業藐孫堅  
摠衣展拜頻瞻望古廟遺容日月懸

渡淮遙望中都有感

春暮東風慙雨多征人此日渡淮河南瞻故里徒懷望  
北顧神京未易過豐鄣蕭條餘饁畝濠梁慘淡憶鳴珂  
長流不斷千年恨禾黍離離發浩歌

宿徐州

楊柳依依紫陌長彭城日暖草芬芳雍門音歇琴何在  
戲馬臺空地已荒雲散夕暘松樹裏鐘聞古殿竹林傍  
大風歌罷增惆悵燕子樓頭一斷腸

南沙河

襆被相隨只一身迢迢大道冒風塵馬嘶斷岸依芳草  
燕舞長空赴遠人古寺林中花寂寂空山日出轂麟麟  
薰風拂面遊應倦且覓香醪莫問津

雄縣早發遇征南軍

晨鐘聲遠霧濛濛戎馬征車盡帶弓鞞鼓發時山色暗  
旌旗開處日光紅轂推大將看英勇籌借謀臣自竭忠  
且喜聖朝懸上賞平南指日奏膚功

琉璃河

沙明水淨綠參差公子揚鞭躍馬時仰望西山橫翠岫  
俯看東海接琉璃喬松日麗迷人眼野店風飄動酒旗  
何日南來春已暮黃鶯猶喚綠楊枝

內苑

西華門內鳳皇城十里荷香錦浪生金屋輝煌光日月  
銀臺爛熳勝蓬瀛堆雲積翠由天設瓊島飛虹旁水成  
複道垂楊芳草茂五陵車馬夕暘橫

愍忠寺

獨步愍忠寺聽鐘心覺安看雲浮樹杪待月照闌干瑞  
氣飄經閣慈光罩法壇何年逃世外徹夜悟蒲團

長安夜月

海岱浮明月澄澄萬里清笙歌千戶靜雲物一窗明  
回首鄉關遠懷人感慨生新寒逼蟲語又聽擣衣聲

愍忠寺納涼

旅舍逢長夏朱明悶轉添清涼依梵唄瞻拜識莊嚴避  
暑忘蒸灼臨風快黑甜不思河朔飲憩此已安恬

苦雨

雲滿長空水滿涯盈堦蒼蘚倍咨嗟蕭蕭林額蟬聲靜  
漠漠簷牙霧氣遮兀坐惟思傾竹葉卜晴聊與驗燈花  
已憎旅况難消遣禁得陰霾噪暮鴉

新秋感興

新刊風雅集 新三  
天高地濶水悠悠一望關河塞北秋錦字早憑鴻雁影  
巧雲初掛鳳皇樓淒涼偏見空床月蕩漾猶如不纜舟  
最是江南鱸膾美也應歸櫂渡芳洲

過金臺

當年燕王築金臺今日臺荒雁影來肅肅青松煙霧鎖  
芊芊白草夕陽開悲笳欲訴明妃怨短笛應憐漢武才  
爲問昔時屠狗客至今勛業可塵埃

秋

颯颯金風起寒生四壁秋天高嵐氣淨雲散樹聲留南  
國音書杳關山箴策愁臨風多感慨月已上簾鈎  
回南早發白溝

疆域分遼宋溝泉日夜流寒風吹曉月鴻雁唳淡秋露  
滴榆楊冷鴉啼煙霧愁此心還泛泛歸夢到南州

冬夜渡河

天涯孤客劍隨行月白霜飛疋馬征一望波濤連宇宙  
疑聽叱咤遶彭城峯巒暗轉疑豺虎墩堡斜傾認甲兵  
隔岸呼舟舟未至東方日出海雲平

采石漁舟

采石江頭漁獵多挈舟弄槳共風波一聲齊出過江去  
理網收帆爭唱歌

拜李供奉祠

殘碑蠹秋草祠宇亦荒涼賴有先生在能令山水香江

聲搖殿閣空翠冷垣墻知是神仙謫精靈未渺茫

從軍行

箴策一聲動戎車列兩行輕裘開虎帳赤羽導龍驤弓  
抱千山月刀懸萬里霜勿言征路遠留意在瀟湘

春宮怨

芸窗複道草芬芳凝罷新妝出画堂池畔遊魚吹激浪  
簾前飛燕蹴霓裳風飄玉珮渾如夢泪濕紅衫黯自傷  
欲鎖春光留苑內好教花鳥伴蘭房

端陽

群不逞誣構試旋控撫軍判令原籍訊鞫因得歸里

梅雨瀏瀏日正長親知饋酒佐蒲觴去年北地今南地  
此日家鄉作異鄉客過荒齋欣邂逅苔生敗壁莫淒涼

杯拈淺碧休辭醉似石榴花放野塘

遊太平寺

傳說太平寺今來偶一過舟行環絕壁塔影枕清河翠  
竹埋幽徑青松挂薜蘿盤桓雲水上撫掌一高歌

送友人登舟


村居長閉戶爲客到河梁花覆危墻動風來野艸香僧  
邀權啜茗鳥語正如簧爾自扁舟去淒淒雲水鄉

秋夜

唧唧虫吟切淒涼枕簟生西風催木葉疎雨暗山城展  
轉不成寐呻吟空復情干戈何日罷萬里快清平

江上行

信今集



原件短缺

P6

新者屋牙卷 新五  
聞道江頭鱸鱖肥漁翁沽酒掩柴扉蘆花一片渾無主  
柳線千條失所依浪逐河洲驚落雁煙迷吳楚泪沾衣  
可憐獨立空回首湖海茫茫何日歸

覽鏡

數日畏凝妝强行步不正早知形影單何敢頻臨鏡

秋海棠

嫋嫋依臺榭含情倍可憐臨風嬌且怯照水媚猶鮮不  
與春花競而同秋月娟仙容那得似使我夢留連

濡城赴金斗過芙蓉嶺

柳色青青山徑淡野花滿路不堪尋翠微隱約朱欄出  
匹練潺湲白石侵黃鳥細聲遊子泪綠茵一片故園心

北交爭地墩堙沒古丘彭城新月上照我酒卮浮

下坊


夜半不成寐披衣坐月明竹搖山勢動雲暗客心驚遠  
柝知何處浮踪愧此生無才分家食常繫故園情

代輓

化鶴歸來識舊村御風飄泊向誰論琴中流水弦猶在  
几上浮煙影孰存慘淡松杉悲故舊蕭條旌旆引芳魂  
蒼江歲晚奚堪此薤露謠聲倍泪痕

和范子道文原韻

練江澄徹淨無波猶憶孤松掛薜蘿笑我浮生增感慨  
嘉君意氣豈蹉跎歸思徒切林泉興浪跡惟應酒賦多



原件短缺

P8

不棄維桑知有約擎杯高論瀉長河

自題恥園

恥園荒址昔樓臺高士文人盡日來修竹千竿芸閣暗  
藏書萬卷講堂開于今僅得歸空地弔古難忘問老梅  
三徑支離無可語撫松揖石且啣盃

泛西湖

久與湖山約扁舟冒雨來蒼茫望煙水空翠結樓臺柳  
浪六橋接荷花兩岬開勾留彩鷁處歌舞幾時回

泊湖心

返棹湖心泊淹留不厭頻山川似西子晴雨總堪親麗  
日還宜笑淡煙想帶顰貪來數晨夕不記是歸人

夕照在邗溝煙波四望收名園花欲醉歌舞興難酬欲  
待虹橋月先登法海樓王孫歸馬疾蹀躞上揚州

題水雲菴

郭外長堤柳一灣高僧結舍自閒閒影分竹栢青歸水  
石長苔花翠到山時有流雲依戶牖長聽好鳥噪柴關  
攤書臨帖朝來課二仲相招日往還

重建文閣告成述懷十首

黃山奇秀入雲峰司祿樓臺望蔚宗隨震巽方開泰運  
恒臨兌澤鑒觀容長垣嘉蔭千尋樹峻閣聲傳萬石鐘  
信是詒謀多戩穀顧瞻百尺憶元龍  
懷先叔祖太學求如公創建盛事也  
悠悠潭影漾遐峰混混原泉識所宗藹藹瑞浮晴沼藻

晶晶日麗曉山容關關鳥語如絃誦沸沸濤聲雜莖鐘

濟濟衣冠成雅會彬彬文物著雕龍懷先祖明經公褒盛舉倡文會也

水清沙白駕長虹莊惠觀魚興畧同寒盡不飛安道雪

春來幾度舞雩風瑤琴調古聲猶永筇杖心虛節自雄

肩荷斯文匪異任美材蚤已付良工叔祖求如公同先學林公遊閣上以

方竹杖昇先公屬以主持文會無令廢置

高閣浮雲壓彩虹苾芬禋祀歲時同恠逢覲黷滯香火

頓使神區熾孽風道路共嗟隳聖迹村居誰是出群雄

劫灰掃盡存遺址三十年來竟廢工追往事也

扶筇散步傍潛川古居安名悵望荒臺思悄然日暮關心懷

故閣何時再造荅先賢固知棄置非由我應識謀成啓

自天但願後人能負荷終期輪奐繼當年述先學林公素志也

舊時臺榭舊山川素志重興非偶然經濟無能羞往烈

文章未逮愧前賢臨淵不覺驚蒼鬢陟岵空悲望遠天

楹桷勉承先世澤敢云丹蘄媿當年遵先志也

帝座端居迥絕埃萬山環拱一溪澗松搖虬影參差出

梅發清芳次第開西有文峰聯白岳東羅秀嶼接天台

登臨彌望皆形勝神格人欣欣福杯記佳勝也

樓頭飛雁遠塵埃臺下潛蛟樂泐泐雙竦半隨華浴出

千秋潭名一帶夕陽開圖書自昔歸東僻藝苑從茲達上

台最喜東山砥柱譽髦暢洽紫霞杯文閣落成聞諸子姪捷報誌喜

歲晚收功未足遲老成任事有心知佐籌每憶阿于調

新十  
勞苦渾忘况瘁詩示我周行芟枳棘迎人堦祀徧蘭芝  
國工巧度真奇妙屈指經營幾許時感家永安兄受任告成之速也  
艷發園林春日遲惠風凍解錦鱗知秋潭漱灑張融賦  
軍石璫瓏摩詰詩馥郁餘香森寶樹網緼淑氣長金芝  
重輝奎壁應文運會見魚龍汲浪時

新洲堂成偶成八首

春和日麗柳飄揚麥浪參差綠未黃吹面不驚人意好  
成文更笑水心忙琴隄走馬塵微起文閣觀梅袖染香  
寄語東皇勤着意千紅萬紫待芬芳風  
奇葩異卉未經栽堤有垂楊岸有梅遶屋氤氳歲小苑  
滿池濃淡照蒼苔蹊成莠李迎人笑室有蘭芝向日開

蓉桂晚芳尤麗密四時佳興任低徊

花

雰雰飄灑望迷離玉樹花藏第幾枝銀海乍搖人命酒  
玉樓方聳客題詩公車待詔懷東郭冰柱高吟憶退之  
縱酒此時如挾纒灞橋策蹇又何爲雪

夜色縱橫露正滋寒光蕩映鎖南枝不知林下人來否  
且看亭前花影移漏盡千山同雪皎宵深萬壑似煙吹  
嬋娟此際應相惜玉宇瓊樓動遠思月

村居寥落與誰隣着我堂中倍可親載酒何人堪共話  
裁詩隻影易傷神攤來卷帙宜酬酢放下蒲團數夕晨  
懶向溪頭弄雲水凝思禁足養閒身坐

瞳瞳窗影見明霞息影空廬興倍加藜榻自依生就石

匡牀還對欲開花元龍百尺書爲枕杜甫千間夢當家  
反側不嫌仍待寐喬林角角噪晨鴉

賦

小園無事日徘徊池畔支筇問古梅野鳥忘機隨我逐  
游魚吹浪爲誰開不將細帙招青雀且自經行繞綠苔  
二仲宵過還結伴芒鞋到處欲追陪

行

竟日推敲可療飢經行徙倚總撚髭兩晴相得情無間  
辛苦含毫願不移二阮風流難企也三唐詩句任摹之  
堂成更與吟唇約仔細相尋莫惜疲

吟

偕程子晉三家姪殿先取徑海陽北源大士崖冷

水亭入黃山姪舫齋以暑不果行

紅藤碧篠引烏巾炎徑探奇有宿因石鑑瑤牀金粟相

丹崖翠壁玉毫人巖陰珠落全無暑樹密雲深最可親  
得句且酬賢小阮游歸當悉話嶙峋

初至祥符寺過莖花源

重巖蔭層陰朝曦漏林表潺潺聽雨花雲竇看縹緲榭  
翠籠疊石荒徑衣蘿蔦古刹足幽尋紫玉縱憑眺紅藤  
凌白霧鶴銜出林杪何必覓武陵穿苔入筠篠遙聞潭  
水聲白龍掛溪淼

六月六日過祥符古刹和羅念庵先生壁上元韻

峨眉縹緲青天落彷彿峨眉媚又此山紫玉軒中瑤席在  
白猿清嘯萬峰寒

珠簾曉掛千山翠古墨層層護白雲天上三峰孤秀絕

丹爐藥鈿更逢君

白龍潭聽泉歌

我聞匡廬瀑布掛千尺雷碾錯落穿層石銀河倒瀉萬  
仞高恍惚晴空飛霹靂上有玉龍奔天闈下有龍子看  
低昂萬鼓震崖水犀怒峽束眺沫如瞿塘我來響雪  
忽叫絕水簾飛下澄潭澈欲騎赤鯉招白猿同向軒轅  
問真訣

尋丹井

循澗聽琮琤碎碯應虛谷玉液轉銀床軒皇此湯沐猿  
脯一天秋衆峯攢六六聞道駐朱顏九還寄林麓濕翠  
響空濛清音等琴筑汲此鍊丹砂流雲護深綠

湯池

軒皇湯沐滌煩疴盪滄陰陽一氣和感沸古今隨吐納  
扶桑晞髮我曾過  
丹砂鍊就沸明珠海底風輪結構殊日月跳丸何日歇  
炎光赤水是醞醐

文殊院早眺

玉屏巖窟望蒼蒼絳節丹梯控石梁破曉雙眸舒眺遠  
放晴千嶂捲雲長珠函乍啓飛花雨銀海爭看禮法王  
面面瓊樓誰構得遙聽鐵笛落天闈  
琳空繡壁紫煙中五色蓮花耀曉瞳帝子神仙香界出  
金書玉簡絳霄通鼇身涌浪松陰碧蓮蕊飛英木草紅

瘦玉一林看秀削當年立雪構巖東

岩東當年有立雪亭俯視石筍在

雪莊大師後海種梅和韻

春到山中多韻事編籬幾曲待移梅乍聞寶樹施蘭谷  
絕勝離宮築露臺屈強冰心堅白石摩挲鐵幹護蒼苔  
殷勤野叟分奇本好向丹丘淨域栽  
英英一塢白雲平旭日扶業未辨晴烟火炊殘看海沸  
衲衣香過指山盟耕田鑿井忘今代穴處巢居寄此生  
莫道鴻濛開壑後巒岵峰下樹初成  
迦陵翔集有餘音十里空濛不易尋積雪莫教封谷口  
繁花差慰住山心板橋獨立聞清課藜杖相從動苦吟  
慎勿別營飛錫地此中原係舊叢林

淪茗沙瓷對素芬拈花微笑與誰羣偶然跌坐三生石  
隨意經行一嶺雲欲把虬枝叅古佛還聞鳳管禮元君  
往來認作西溪路香霧濛濛晝不分

買山樓託古來難獨羨皮蓬又改觀疑是岱宗松萬樹  
擬同淇上竹千竿誅茅未足牽蘿補服食無餘採朮餐  
一自乞歸辭輦下比年無復夢長安

凌摩霄漢表奇峰飛瀑千尋落午鐘鹿飲澗時香習習  
猿捫蘿處影重重交柯點綴先天石偃蓋支離太古松  
滿目花光雲外見前村耆老又扶筇

平生癖性愛山居何日移家得自如徒想學仙餐脉望  
長聞竊藥入蟾蜍洗心修煉終無易拔宅飛昇信不虛

頗怪凡夫多忽畧蒙莊化出北溟魚  
山僧慣向雪中行看到溪橋徹夜清漸覺月痕隨蠟屐  
遂忘刻漏返柴荆巉巉石棧迷人跡憂憂樊籬折竹聲  
凍雀凋啾飛不定亂香淡處正多情  
楞嚴誦罷日初東拈拙猶存宿火紅一瓣戒香雲縹緲  
數聲清磬石玲瓏廣平賦就才無敵和靖詩成事亦同  
似有飛仙吹鐵笛妙音嘹唳繞花宮

鳩摩卓錫據空山羨煞蒲團白日間每與漁樵爲勝侶  
不妨瓢笠見仙班花香苔徑携琴坐飯熟松門洗鉢還  
我亦向平猶未了他年辟穀棄人間

筍嶺觀海

置身千仞上光影靜能分竦峙圍丹嶂奔騰響白雲御  
風翔海氣歸壑辨波紋澤國曾經歷微茫舉似君

寄懷藏山獨任和尚

撫几藏山閣鐘山在眼前時時坐相對終古山蒼然雲  
樹望中盡蕭閒此地偏何時共吟眺一笑虎溪邊

旅宿有憶

逆旅一尊酒懷人意正賒記曾翻白紵盡爲譜紅牙高  
館圍明月旗亭就落花此時應有恨咫尺隔天涯

山考坑至徹灘

觸日荒涼盡傷心野望中寒威能斂日酒力不禁風客  
路巡山骨肩輿入竹叢更愁天漠漠雪片舞寥空

寒江雪泊

晚泊六花飛孤舟枕鵲磯龍鼉風益鼓天地夜何威世  
事江河下人情雪霰微茫茫百端集回首幾歔歔

曉發上河

難後輕鄉土遭逢半畏途長征衝雨雪短褐狎江湖水  
澗千帆遠山遙一縷孤推篷問舟子已過石城無

湏江過叢碧亭

衝泥尋野徑市隙遘林塘石砌留殘雪亭梅落古香叢  
篁延鳥語雜樹接山光最喜登臨候樽開就夕陽  
泚水探名勝幽棲此一亭竹陰依檻碧山色到門青帆  
影分前浦漁歌亂遠汀六時鐘梵裏猶記舊曾經

贈歸希之

所見有懷素自叙真蹟蘓黃米蔡各種  
書褚登善哀冊所居懷古閣

清鑒傳懷古瞻依已數年質皆三代上品亦義熙前晦  
跡從葵鼎逃名託市廛蘓門聆向嘯得覲鹿門仙  
一閣繙千古圖書自有真黃農虞夏物漢魏晉唐人目  
賞紛難給心娛不厭頻縱觀非偶爾數刻亦前因

小集虎丘分韻

小集成良會三生信有因春殘新月夜亂後舊詩人世  
事輸尊酒時名重隱淪相逢勤聚首縱飲莫辭頻  
片石憎羅綺翻憐夜得閒殘春花雨寺新月虎丘山景  
物淹遊屐烽煙瘁客顏天涯良會少相對莫輕還

吳門返棹雪阻旬日偶得二首

歸路淡冬苦停舟雪未殘風來荒岸濶月到大江寒夜  
讓魚龍穩居憐鳥雀安雲邊親舍近遙望起長嘆  
野泊怨遙夜朔風吹未休遠鐘分斷岸急雪響孤舟逼  
歲凋青鬢思歸拜白頭寄書多不達江路苦悠悠

送友之吳門

輕帆秋晚出一棹下桐江兩岸丹楓路都歸白版窗鴛  
湖鱸正好嚴瀨雁飛雙知己多吳市遙知倒玉缸

七夕時原配程孺人病逝

急雨響簷頭蕭森氣已秋自從斷鳥雀不復問牽牛瓜  
菓空相設邨沽孰與謀宵深眺河漢風露淨悠悠  
逆境無佳節長年廢嘯歌記會同老友猶一咏銀河天

上情難問人間事總訛蒲團初月下前此任蹉跎

送嶺上先生還山

鹿門有高躅公肯繼前賢嶺上去歸隱山居課種田雲  
霞鄉國近歌祝道途偏漸邇神仙宅衝寒入紫煙

送泊山上人遊黃山

萬仞摩霄漢孤筇越幾重玉屏峰上立俯矚碧芙蓉此  
地久相待畸人今始逢松門是前路早晚駕雙龍

贈石城獨任大師

共有尋秋約禪棲謁遠公道心高座得詩句古人同文  
獻存方外乾坤剩此中相過多逸韻不是愛談空  
何處堪憑弔鍾山日在樓六朝餘古蹟一閣闕殘秋世

事到來盡人情何所求王宮存廢圃入望轉清幽  
五人墓

一時情激發不意遂千秋舊有要離子英風自可儔山  
塘爭弔古落日一維舟城北茫茫土何如此一坵

夜過赤鑄山

秋山見蕭寺落葉舞寒空翠輦經行處寒花開幾叢月  
高衰草白潮落夕陽紅莫問前朝事輕帆趁北風

山溪暴雨

冬暄常作雨遠岫起層陰雲氣忽然合山前溪水深長  
途幾沒骨日暮頓驚心信矣征人苦荒邨何處尋

柳山道中

西風吹木葉林際易凋殘不敢怨搖落初冬氣已寒貧  
諳爲客苦老覺別家難一夜瀟瀟雨溪流響急灘

夜集新洲堂聽陳郎度曲

過雨謀懽遣明燈共草堂乾坤絲竹穩丘壑嘯歌長情  
爲三春劇花餘一水香朋樽堪永夕幽興各相當

初夏

淺夏多幽事還山興不孤飛飛花引蝶站站燕將雛晴  
草薰晴徑淡居選綠蕪寂寥耽卷帙著論是潛夫

舟泊西梁山下

蒲帆下晚煙繫纜傍隣船石斷峭崖立風多古樹壑漁  
乘沽酒火水沒近邨廬旅况終宵醒推篷待曉天

舟暮泊采石

日落晚山蒼風潮打客櫓漁舟多背月雁影早衝霜風  
露浩無際星河澹渺茫愁多不成寐小泊翠蘿旁

七夕集寄園分韻

令節乘初雨微風暑乍消高空望牛女今古此良宵天  
上標銀漢人間艷鵲橋不須慚老至頭白解招邀  
池館延雲樹佳時集酒人星河遶韻事風露浥清塵水  
際搖孤影簷端掛半輪當時記瓜菓兒女話酸辛  
紅筵開靜夜乘輿晚來過清露澄珠斗流雲帶絳河人  
間良會少天上艷情多鵲駕年年事仙機罷玉梭  
針樓追往事此夜拜雙星綵綬分机杼天孫倚戶庭乍

翻金鏤曲遙指玉鉤形環珮都如夢清歌不忍聽

別浦看來暗林園暑乍消天風吹玉露銀漢解相要乞  
巧占蛛網酬詩憶翠翹臨風懷往事猶記可憐宵

集新洲草堂聽友人吹簫度曲

朱絃一曲正更闌人立瑤臺晚不寒四坐明燈來鏡裏  
又看月影到欄干

鐵撥檀槽拜段師涼州樂府唱新詞不禁跋扈飛揚甚  
韻事拈毫盡入詩

吳門舊事

曉風殘月渡澄江共赴瓜洲白板艤指點金焦猶歷歷  
波瀾端使客心降

画船箫鼓虎丘山小泊聽歌盡日灣為謝殷勤花底蝶  
不將金粉浣衰顏

喧闐聊且付逢場小立巡簷共覓凉忽聽鈞天歌一闕  
始知仙響出吳剛

乍聆河滿氣如秋仰見微雲澹不流子夜聽來難擬似  
画簾風定一絲游

清歌一座盡開顏笑煞叅軍語帶蠻十五國風全領畧  
霓裳端不在人間

新洲堂聽歌

疎林黃葉響秋岑好月清歌到夜深自有鍾期能入聽  
連宵不負伯牙琴

張

潮

字山來號心齋歙人黃岳先生仲子以明經官翰林院孔目僑寓廣陵家多藏書雖兵燹

散失然尚不下三十乘性恬淡不樂仕進肆力于古著作等身有心齋詩集聊復集詩幻唐音丹笈集字詩逸民四史檀几叢書昭代叢書花影詞筆歌集虞初新志心齋雜俎數十種行世士大夫之舟車過邗者式盧定交臺閣文章鉅公時通訊問聞張子之名如聞古人讀其書如獲異書其深造至此真不易得也以不善治生家日落未能奉彈鋏客時疾於心然膠膠好古高行絕俗海內之知張子者莫不為之心折矣

凱旋詩

於我 皇清維

聖天子繼序在位於今三紀聖神文武則靡有似宐民  
宐人柔遠能邇薄海內外永靖奸宄  
西北之陞蒙古攸域各為部落莫可紀極咸奉正朔曷

敢遑息聿有小醜日厄魯特蠢爾無知擾其與國

維此與國實爲我臣喀爾喀兮卽我人民爾往侵之我

寧罔聞忍卽加誅誨爾諄諄庶噶爾且悔罪維新

蠢茲小醜罔悔厥辜自外 王化靡懷永圖潛匿邊境

磨其爪牙叶誘我屬國搖其室家叶信誓旦旦亦旣以

渝

天子曰咨蠢茲寇賊汝費揚古汝孫思克整爾戎兵以

征反側一西一東執競用力維予一人中路馮軾

天子曰噫爾無內訌其或來歸我卽爾容維彼之旅天

誘其衷若崩厥角稽首則降叶

天子宥之以厲厥終

惟噶爾且如鬼如蜮外雖乞降中實罔測維我六師旣

齊旣飭無或遄歸載壁其城爰待來年競往誅殛

二月初吉春日載明躬帥禁旅爰方啓行次狼居胥赫

赫厥聲凡我將帥

王言是程適符

帝慮踴躍用兵

天子曰嘻予豈好勞藥不晒眩厥疾曷瘳叶載謀諸心

載詢諸朝親泣塞外以度以料勗哉庶士黽勉邊徼

旣輿我糗旣羣我馬叶遠適異國洊歷寒暑不水者地

不毛者土靈泉載涌庶草蕃廡

祖考式馮何

天之祐

維彼小醜曾是不意

天子征之三臨其地哈密小臣恪共乃事獲其孽子是  
俘是係獻諸 行在敢告

皇帝

彼噶爾旦力窮勢蹙衆心已離有覲面目仰藥絕吭噎  
于空谷維彼私人怨其塗毒獻馘來庭咸思內屬

念茲戎功維

帝其成之西北小邦繼世其寧之匪遵

聖謨曷由承之矯矯武臣鐘鼎銘之溥天之下罔不榮  
之

允矣

天子宐君宐王昭告

烈祖孝孫有慶

叶

上帝耆之益土宇取章小臣獻頌以揚耿光於億斯年

篤祐無疆

右凱旋詩十四章章十句

夜遊虎丘看月歌

中秋月色天下同一切攝入光明中惟有虎丘擅奇妙  
千人石上尤稱雄傳聞此夜遊人聚如蟻喧闐直使兩  
耳聾肉聲絲竹紛並作陽春白雪寧渠工夜闌歌者漸  
星散止剩幾輩清奇翁世俗呼爲老字相一簫一扇精  
磨礮歌聲旣發衆皆啞引商刻羽天爲空于時隻字不

容贊坐待月落歌纔終我生怪事咄咄從來不識虎  
丘月耳熱神馳四十年難值中秋高興發今年初夏吳  
門遊虎阜門前暫逗遛雖然已過四月望月好不減干  
中秋此際登山尚昏黑群季同行慮顛踣特訪當年舊  
識僧養茗提燈頗供職捧出蔬拌味頗佳花醬芥菹多  
異色又有水製黃楸芽亦堪佐酒兼佐茶苦遭高樹礙  
明月恨不斫却青枝極忽然大笑我何拙曷不移尊就  
月徒咨嗟移尊恰喜月當面閃爍晶瑩成一片十八依  
然月尚圓知是天公着意供留戀惜哉席少善謳人不  
及中秋之一線夜闌帶醉上扁舟夢中似陟清虛殿

研山歌

高士素多泉石癖每喜山中伴奇石有時仗劍思遨遊  
石不可移空太息安得大石化如拳隨身跋涉相周旋  
摩挲玩弄飽雙目几案便足生雲煙方君示我一拳石  
五峯彷彿蓮花碧自云市上偶相逢買歸不啻如琮璧  
初時顏色尚黢然手澤頻加不暫釋久之漸次發奇光  
溫潤晶瑩黑如漆迴環宛轉復玲瓏筆牀硯匣晨昏同  
秀瘦透縐竟全備儼出米老懷袖中秘藏勿與貪者見  
恐遇當年楊次公

集李太白詩

東風吹客夢一往桃花源各守麋鹿志都無人世喧閒  
雲入窗牖綠水接柴門他日還相訪宛然林壑存

有時忽惆悵惆悵一何深復作淮南客時爲梁父吟酒  
酣舞長劍腸斷聽秋砧大雅久不作無人知此音  
春光掃地盡庭樹落紅滋芳草換野色疎楊挂綠絲天  
長音信斷心靜海鷗知忽見滄浪樵投竿也未遲  
試發清秋興乘船往石頭山從人面起江入大荒流香  
閣凌銀闕青天懸玉鈎留連百壺飲無日不悠悠  
誰憐明月夜正值秋風時樹色老荒苑荷衣落古池空  
名束壯士白髮見生涯不與世相逐空吟招隱詩

梅花詩

集杜

寂寞春山路山花已自開澗寒人欲到客散鳥還來再  
宿煩舟子忘歸步月臺墻東有隙地臘月更須栽

雁字詩

關塞三千里飄零似轉蓬偷生長避地愁坐正書空落  
日平臺上江村亂水中野鴉無意緒飲啄幾回同  
艱難歸故里沙道尚依然咄咄寧書字迢迢獨上天看  
雲莫悵望鍛翻再聯翩俯仰俱蕭瑟歸來始自憐  
狎鷗輕白浪爾獨近高天素練風霜起空林暮景懸飛  
騰知有策出入最隨肩勲業青冥上添予別興牽

集蘭亭記

此日春將暮群遊聽所之形骸欣有托少長快相知盛  
矣無懷世天然極樂時暫將諸事舍浪迹永爲期

集懷素自叙

有興擔遊笈雲山欲蕩胸煙橫新長草藤寄半枯松醉  
語風能激狂歌月自從誰能知此意江外兩三峰  
賞心唯翰墨寄興有詩書醉後天真見狂來禮法疎已  
能安飲水何事嘆無魚淡蕩胸懷好長歌侶太虛

集顏魯公祭姪帖

午日弔屈原

午日同人酌常傾九節蒲誰知魂不死每悼德何孤青  
史傳幽少丹心愛遠圖年年時爲祭嗟爾饗還無

集顏魯公述張長史十二筆意

道在何言命居安不問天牽懷攻翰墨適意憩林泉自  
足高前古無容說大年餘生唯著述一任衆人傳

集褚河南書枯樹賦

江南三月莫花落燕斲歸雲起山要斷煙紛洞口依文  
鴛臨錦水白鶴守荆扉不盡關心事何堪獨採薇

花洞天

原有耽花癖今尤不可支栽培能割地灌溉特穿池異  
種人難測新名客未知何年譜成史借我細繙披

囊空者數日矣偶于地上拾得一錢感而賦此用

杜工部空囊韻

愁多拚縱飲胃弱怯加餐素識世途隘休嗟行路難錢  
神傷久別詩膽媿新寒拾得青蚨好歸囊祇自看

秋鷹二十韻

金風原凜冽異種自雄豪不惜依人慣寧忘祭鳥勞羽

豐知祿厚喙利識功高天外追形影空中灑血毛嬙聽  
雞喔喔遑恤雁嗷嗷振翮監奴伺梳翎健卒搔圍場恢  
廣大飛跡縱周遭賓從疲彤瑄公侯費綵條帽妝紅綬  
縷鞬飾翠雲濤逐兔難容狡為鳩詎改操勁翰生卦畫  
鉤吻鬻霜毫祇為誅無禮非關恣老饕抉雲供奮擊畧  
地任搜牢疾比行間矢銛疑塞上刀草枯貪出沒木落  
快蕭騷俊鶻差堪伍凡禽孰敢曹蒼黃猶豹變臂指等  
烏號歲久羈甘受恩深繼忍逃來王同越雉底貢亞周  
葵獵罷還歸晚開筵足鼎膏

清淚痕

歡娛只有戊辰春兩月綢繆意共親刺繡巧雲傳妙手

情至語死解人不  
能道

畫眉新月如纖顰有時問字茶杯覆用李易安事永夜藏闈

酒盞輪此外更無舒鬯日六旬難敵十年屯

安得年年似此年便教短命亦神仙月傳琴操兩三曲

日誦唐詩六七篇起草四聲徐覓句簪花八法漸樵箋

閨中韻事如師友縱費心機不枉然

死去誰能不慘傷鄰家亦覺歎聲長人經識面皆垂涕

花與關情即毀妝予庭中木香玉簪皆死西府海棠亦無一花潛德若無相

感處悲聲那得有孚將最奇不費芒鞋力適卜佳城在

故鄉予故鄉巴山適有佳穴且與年命無礙

生時尚覺怯春寒死去應知行路難漫向夢中尋笑語  
應于地下待團圓權歸秃筆誰能奪恨駐修眉我自安

寄語同儕休慰藉一聞慰藉更悲酸

蕪城春興

用周荆山原韻

花茵為地幔為天雨過依然景物鮮尚愛餘香堪索笑  
况逢勝友各爭妍無端酒醒高吟後底事春歸落照前  
試問儂愁何所似依稀野水漲晴川

哭大司空湯潛菴年伯

衆醉由來忌獨醒先生祇合托鴻冥采芝偶見商山叟  
騎尾空悲傳野星數載吳中頭易白九重天上眼原  
青今朝不僅為公痛嘆息人間失典型

西湖漫興用尤悔菴先生韻

急趁新晴結伴來良辰引得好懷開休嗟池廢生誰放

劇愛橋迂水欲迴酒興漸濃忘白眼詩喉偶渴覲青梅  
鳴榔特過湖心憩應接紛然面面催

送黃交三遊山左

匹馬長征秋正中桂花香裏軟塵紅延陵公子堂虛左  
江夏黃童道欲東夙有文章曾作合應知水乳更交融  
臨淄舊俗今何似好倩詩人為采風

合肥李容齋相國廬墓北郊有白燕之祥同人賦

詩紀事效顰寄政

雙影差池丙舍留為憐幽獨共山丘泥啣枕塊驚翻雪  
尾掠波紋訝聚鷗反哺未容烏作伴覽輝應許鳳為儔  
投懷好憶當年夢燕國鴻文兆黑頭

芒鞋詩爲李若谷賦

幽人素履憺無營不借頌來自友生飛去直同仙令鳥  
聽時偏傲鄭公聲逍遙物外成高步坦率吟餘得緩行  
此去長安多倒屣天街共擬快縱橫

再哭吳聽翁

誰說窮途仗友生忘機鷗鷺始堪盟一官不博三食飽  
萬卷難償兩目盲久付功名同夢幻徒留文字作章程  
莆田遺老新詩到添我哀吟四五聲

祝余曼翁八十

用自壽原韻

閩海吳趨連建業一生踪跡遍名山斯文在世都爲壽  
吾黨如君始可閒身入煙霞明白髮興隨簪珥媚紅顏

幽情傲骨知何似彷彿當年夷惠間

菊影四首

選三

嬾向秋陽逞艷妝清宵掩映短籬旁煙雲淡寫高人致  
水墨輕描隱士裝瘦葉幽花誰與辨濃陰冷韻孰能詳  
夜闌宴罷還留戀贏得形骸傲曉霜

栗里何須問夙因移家到處結芳鄰塵埃不染秋容老  
色相全銷傲骨新誰識燈前偏作態無妨月底一呈身  
延年復擅離魂術莫向東籬問假真

南山誰復詠悠然秉燭爲歡不耐眠製就素屏堪位置  
裝成粉壁待流連高風久信能知黑幽意今將效草位  
試問柴桑曾識否料應神釋有新篇

徐青藤四賣詩膾炙人口予彷彿其意作四破詩觀者為笑為憐聽之而已 選一

犢鼻休譏南阮貧堪隨傭保溷風塵狂來敢辱諸君入傲處幾同鼓吏嗔最恨鼠殘成洞穴更慚溺斃類披敝有功願學韓侯待純袴仍貪若輩新 破禪

竹西歌吹詞

畫船簫鼓小秦淮分得鈞天一段佳明月漫愁客易盡蓮燈能照踏青鞋

和冒青若剪韭詩三首 選二

君家食譜解翻新生面時開不厭頻莫道韭芽非異味侯封千戶幾曾貧

張兆鉉 字貫玉別號迂菴歙水南菴源里人父省菴公守鄧州稱廉刺史卒于官迂菴讀父遺書補博士弟子小試利大試輒蹶困諸生者三十年能詩不欲以詩鳴澹泊明志資硯田自給生平重然諾坦白真誠當世重之尤負氣急友生之難當頭沛危迫而氣愈厲事已有奉金以壽者卒謝絕而後即安荏苒內訌將潰道遺胠篋不貲斤為非義未嘗涉目其高致如此或有目為迂者因更號迂菴晚年引例為國子生客游漢江親舊爭客之適館授餐滋益恭自撰有迂菴外傳所著有望雲樓詩數卷此則其自選者

月夜獨坐

庭前有脩竹疎響清吾耳月色浸空庭滿庭如秋水昂藏一杖藜獨立竹陰裏寒蛩階下鳴飛鳥林間起清茗啜三盃啾潤殊美夜坐了無人澄懷悟原始秋郊有感韓昌黎幽懷不可寫之句因次韻足之

幽懷不可寫獨步秋江潯澄潭澹雲影隔岸蔭清陰輕  
颯颯然至微涼沁我心緝蠻林間鳥狎人呀好音碧空  
鴈嘹唳如助予行吟俯仰有遐思塵累庸相侵浩浩天  
宇濶雄視古與今

靖寇歌 頌郡守曹冠五夫子

天都古巖疆險阨無與擬六水競朝宗奔流激而駛五  
嶺鞏與區屹如劔閣峙形勝雖云固得人斯足倚天  
家重守相特簡曹太史潔比玉壺冰湛若練溪水文教  
廣薪樵化雨滋莠李惠風鼓萬彙三農樂耘耔惟是星  
源邑僻處郡西鄙壤介鄱饒間萬山盤礪礪逋逃萃淵  
藪頻年積封豕出入肆剽掠保聚踞高壘蔓延日浸熾

誰慮隄潰螿公懷未雨憂決策除奸宄躬探虎狼穴峻  
仄難方軌攀陟披蒙茸霜雪砭肌髓捐金募間諜要害  
皆諦視布算陳樽俎發縱動頤指當機早制勝所向自  
披靡渠魁悉殄殲脅從任更始歸誠日欵門竟不煩折  
筮根株盡剪拔萌蘖終弗起師還市不驚頌聲震千里  
膚公彤管載緯績豐碑紀經文并緯武公殆兼之矣漢  
廷多循良龔黃差可擬會見晉台衡坐論資燮理靖獻  
懋嘉猷明良歌燕喜

勸學歌 勉及門漢菟昆仲次昌黎讀書城南韻

人之致千里惟假馬與輿士之振家聲端必自讀書讀  
書貴及時往訓良非虛少小多玩愒老大悔厥初爾翁

惟力學貴顯高門間光前兼裕後流輩盡弗如淵源承  
家訓抗志北溟魚雲程能接武豈患生計疎况列名邑  
庠角莠多犀渠司衡程高下判若龍與豬不見某氏子  
超乘越蟾蜍不見某氏子忸怩如蟲蛆榮辱在一時勤  
惰由平居歲月恒蹉跎是誰之過與學問難蹴至藏脩  
漸積儲妙年學殖淺安不盡三餘含英并咀華誠哉樂  
只且古人畊且讀出入帶經鋤勤敏日精進庶不類黔  
驢時習鮮茅塞肄業同菑畬克家固爲孝猥瑣當屏除  
心清文乃工宮牆可振裾世家復鵠起同儕更稱譽新  
齋特攬秀極目環林墟新編盈几案策勵勤卷舒焚膏  
以繼晷幸自惜居諸專心與致志勉旃勿躊躇

出休寧西門陟白嶽

山距城二十里

海陽西郭外靈巖入望紛巖嵒  
蠢蠢躡阜縹緲飛煙雲鬱  
蔥氣噴薄杳靄宿氤氳行行到山麓  
澗泉漱清芬拾級  
天門近洞闕鬼斧分空谷傳天籟  
削壁彌蘚紋仙真境  
靈異所見符所聞遙望太和宮想同此云云

白嶽齋宿晨起

晨起望玉屏玉屏色淡碧閃爍仙靈居  
黝闇龍蛇宅晴  
空淨如澄秀障開繹繹綽約青芙蓉  
相看不可摘雲迷  
五老峰轉矚變赫赤我有新吳釣高天  
如可劃捫蘿一  
從之長漢只咫尺搔首瞰下方爐峰一卷石  
溟濛杳靄  
間煙霧恣浮拍碧澗紅泉飛丹崖青楓積山中  
五月寒

蒼翠拂襟烏天開此畫圖疑是鬼斧闢

寄懷白門蔡璣先兼謝贈言

三年白下客交臂盡詞人筆舌爭雄長所尚或不倫中  
郎饒氣誼襟期迥絕塵慨慷多磊落肝膽率天真聲名  
日洋溢四方來嘉賓賞奇并析疑無間夕與晨清譚軼  
晉魏新詩誦梁陳永言光先德觀行志仁親璣先以觀  
行顏其堂  
魏冰叔  
爲之記花月煙景佳昆季倡和頻大雅藉不墜古道賴  
以振顧予迂且拙咫尺依德鄰高齋時過從抵掌如飲  
醇辱贈先子章聞微表廉臣高調儷白雪不啻獲異珍  
報瓊無以將君固知我貧耿耿抱歉仄素衷良未申帶  
水隔千里結契自有神臨風重懷想翹首睇秋旻

訓贈畢嶠谷投寄墨梅

昨歲白門尸孔席季冬之月寒風迫虛牕映雪授經餘  
獨擁臯比點周易忽報邗江雲翰垂啓緘知是畢君貽  
八行玉屑超玄箸一幅瑤葩出墨池拂几焚枯徐展玩  
冰雪清姿亂龍翰誰其知已月三更我獨分君香一段  
畫上題有惟三更月其知  
已此一段香專爲君之句玩君畫誦君詩拍案咨嗟歎  
絕奇淋漓揮灑標神韻姑射仙人宛在斯我想羅浮遷  
客趙師雄惝恍參橫月落中又想鐵石心腸宋廣平盡  
態極妍賦瓊英又想孤山放鶴林和靖寫照暗香共疎  
影君非三人之後身胡爲乎筆精墨妙如此能入神翠  
然高望躡位賞占斷風光天地春多君管城恒富有媿

我毛錐秃如帚辱贈羈人未報瓊聊綴蕪詞供覆瓿

賦得澄江淨如練

悠悠江水連天碧逝者如斯共朝夕有時風靜一泓清  
無際波澄千頃白臨流凝睇難形容湛澈無塵橫大帛  
輕颺蕩漾激紋生皎月空明紈素闢元暉何事特移情  
幽賞素耽山水癖吁嗟世路多驚濤觀此安瀾樂無斁

落花吟

和邵陽  
唐十泉

逢春喜看百花開送春愁看百花謝花開花謝轉曠間  
東風浪把春光嫁還憶家園花盛時好友開尊集花下  
庖事天涯汗漫遊雅懷逸興頽然罷撩人心目落花飛  
虛度歲華頻叱咤一年好景忽忽去對花空自滾嘲罵

人生行樂莫蹉跎光陰過却難借假記取明年花放時  
早償一刻千金價

送春歌

再和唐  
十泉

流光如駛日相催彈指三春夏又來紅瘦綠肥時物改  
落花片片藉莓苔還顧浮生真若夢九十春光輕斷送  
強自爲歡復幾何聊攄旅况閒嘲弄陽春烟景遍郊墟  
大塊文章自卷舒游目騁懷堪寄託乾坤曠傲一蘧廬  
蹉跎浪擲韶華老跼踏闐闐慙潦倒屈首低眉壯志頽  
慨當以慷吟芳草君不見古人春夜秉燭遊一刻千金  
未足酬清賞高談成勝會坐花醉月遣離愁吁嗟俛仰  
已陳迹後視今猶今視昔作歌此日送春歸來年好把

分陰惜

贈寧都魏叔子

讀書恒慕古君子風節矯然振頽靡吁嗟大道日榛蕪  
疇則先民審其是卓哉章貢魏先生少小矢爲天下士  
磊落襟懷迥軼羣嶙峋意氣無與齒但期稽古拓心胷  
匪事窮經攫青紫探討不輟三十年博綜不僅廿一史  
天人理數洞精微禮樂兵農晰原委置身直許聖賢徒  
壯志欲回天地否經術釀郁發英華詞源渾浩無涯涘  
李杜光芒將無同燕許手筆差可擬奇句時盈古錦囊  
高文日貴洛陽紙蘊藉風流絕等倫卓犖聲名震朝市  
文章鉅公遠締交時託郵筒致雙鯉綸扉延佇急旁求

屢賁鶴書徵不起辭榮匪欲博名高見道分明決進止  
天留碩果啓後學易堂講論擁臯比門多國器儼河汾  
手著奇書積案几龍潛夔屈與時行望重天民良有以  
偶泛扁舟到石頭名流爭致怕倒屣下榻獨登王粲樓  
歛門常滿貴遊履中郎昆季尤好賢斯夕過從無虛晷  
緇衣載咏致慇懃觀行堂中頻徙倚雅集秦淮侈泳游  
逸興噴薄露長技摘詞筆吐廬山雲譚經口決西江水  
天矯莫測其猶龍滿座咨嗟難形似相見恨晚甫浹旬  
一帆忽望大江駛燕子磯頭放浩歌平山堂畔奏流徽  
高人到處感知音吾儕悵望曷其已憶從吾友讀君文  
夢想十年懷彼美乍逢竊幸慰平生良晤偶然聞妙旨

自慙固陋復迂疎望洋未敢輕迫視願言負笈共從遊  
日親函丈承提耳

悶

千古愁難滌搔頭喚奈何銜盃增忼慨舞劍起悲歌痛  
哭非陳策離憂似汨羅空堦時俯仰顧影自婆娑

其二

寸心容萬斛何計破愁城歡笑皆羞澁詩歌總善鳴有  
時因夜雨無處不秋聲欲擬江淹賦撚髭斷數莖

原病

不是烟霞癖胡然痼疾侵生來多坎壈歷盡幾欽欽  
文後尸席鼻比似坐鍼杞人憂復甚何藥豁蓬心

中秋苦雨

浙浙連旬雨沉沉白晝昏縱饒庾亮興難倒孔融尊憂  
歲心如擣悲時舌欲捫多愁復多病秋思豈堪論

白門松年閣爲徐州來先輩藏書處予偶過閣下  
如見先輩典型愴然有懷賦此志感并呈令嗣  
子貫世兄正之

俯仰松年閣居然高士廬酣霜困榦古

閣下有楮樹古甚浸月

素窻虛坊表世臣第

閣右有七世柱史三朝勅命石坊

門多長者車典

型欽宛在私淑問遺書

十春詩次和壽春謝海翁先輩平山崔青峙

明經

春花

應候天葩放芳叢進籥章催無煩羯鼓憐易動柔腸爛  
熨宜含露旖旎藉括香上林春色滿高卉蔭鄰墻

春草

池塘欣得句協氣值初平野映宮袍淺山橫書帶輕萋  
萋縈舊怨踏踏趁新晴雅具濂溪意牕前任綠生

春燕

杏林思振羽來近艷陽天快拂花稍影佢穿柳畔煙不  
巢新幕上偏訪舊堂前畫棟雙棲穩長吟海燕箋

春鶯

鼓吹詩腸趣携枰就碧林聲如調翠管衣是縷黃金求  
友懷知己遷喬愜素心高人期砭俗紅樹正堪尋

春風

條風初送暖凍解曉雲開幸比光庭坐疑從茂叔來芳  
時無擘柳花信早占梅披拂真和暢還踰快楚臺

春雨

和煦蒸靈雨霏霏散錦川土膏滋潤澤野岸漾漪漣雲  
暗千山樹花迷萬壑烟天恩欣普被歌舞徧桑田

春郊

快睹韶光媚青郊刺眼新麥畦平結綺莎徑軟鋪茵艷  
冶山如笑郭熙云春山菁葱景易親懸知遊女伴逐隊

步香塵

春耕

倉庚鳴廣陌駿發降康長鋤雨林花濕犁雲野蔓香催  
耕呼弱柳饑畝擷柔桑預卜豐穰兆三農慶萬廂

春晝

遲遲春日麗亭午煥晴光烟景迎眸艷花風拂面香流  
鶯驚夢短乳燕引愁長坐看枝間蝶雙雙戲逐忙

春歸

春從何處去頓覺客懷孤瘦惜紅英褪肥驚綠葉鋪月  
明啼鳩恨雨濕逐鳩呼擬效風雲詠含毫媿濫竽

蘆鴈四首次友人韻

飛

葦岸秋風抹曉霜驚寒鴈陣競翱翔寥天直上雲千仞

清夜長征月一方逐隊無心成鳥篆漸遠疑欲造鷁行  
羽儀自是超塵外不落平沙淺水傍

鳴

月照蘆汀鴈影分臨風嘹唳喚同羣長空響落寒江水  
中澤啼開野岸雲聲斷衡陽迷遠浦音傳塞上趁斜曛  
憂然孤唳驚清夢耿耿羈愁不忍聞

宿

蕭颯平沙萬頃陰征鴻息羽共窺臨雲霄有待高翔影  
洲渚相依載好音閒伴鷗眠明月穩同酣鶴夢暝煙沈  
索居惆悵天涯客清夜鄉思費寢尋

食

來賓候鴈集三秋  
蕭羽翬翬就野謀  
隴上稻梁聊自足  
河干飲啄孰承羞  
忘機好共鷗鳧狎  
求飼甘同鶴鷺幽  
羨爾不懷溫飽志  
荻蘆深處去還留

送魏冰叔就醫吳興

魏野才名震海陬  
縱橫老筆擅風流  
玉璜有夢終辭聘  
金馬無心獨抱愁  
千古經綸存簡策  
冰叔著有一腔悲  
憤託滄洲扁舟采藥茗  
溪上分手河亭悵遠遊

送甘棧齋歸南豐

時棧齋赴白門友人校書之約不果而返

文章氣老九州橫  
布褐相看舊有名  
獨許仙舟容郭泰  
誰從藜閣問更生  
携來典冊千秋重  
棧齋著有四禮撮要諸書  
載去詩篇一葉輕  
好理歸帆淡自愛  
西江牛耳待君盟

單橋

津河間府距獻縣十五里水源來自滹沱流至縣南與徒駭水合流出天津入海

獻陽襟帶駕長虹  
天府通衢甃石工  
環衛神京周采甸  
輔依雄郡漢扶風  
滹沱冰釋漸流急  
徒駭支連滙注洪  
自是東南衝要地  
星軺絡繹競來同

蘆溝橋

畿南孔道出蘆溝  
萬國車徒輻輳由  
月照飛虹宵忽曙  
風嘶旅騎夏驚秋  
西山翠黛層層峙  
北闕彤雲冉冉浮  
攬轡環觀誇壯麗  
永陪京邑鎮神州

壽程蝕菴七十

荷芰爲衣菊作餐  
玉盟風雅重新安  
叢譚博物誰能匹  
著述名山自不刊  
處士還同高士傳  
客星今作壽星看

當年洛社推遺老碩果真能耐歲寒

登觀音門城樓次壁間韻

平揖羣峯俯石闌煙巒萬疊接長干江天風送奔濤急  
鍾阜雲收落照寒剩得危磯撐砥柱空留舊址闢經壇  
名流弔古多題咏雪調驚人屬和難

其二

城闕登臨共倚闌放開眼界俯江干吳頭楚尾滄波渺  
虎踞龍蟠王氣寒六代風流歸蔓草千秋感慨寄騷壇  
層樓極目烽烟靖今古滄桑紀述難

程

桂字雯脩號二金歛虹梁人足跡半海內客漢  
性孝友負氣節重然諾樂施予力行善事指不勝  
屈尤多智畧嘗以片言感喻大帥軍中為之感動  
壁壘肅然無一譁者為人敬信  
如此所著有學儒堂詩鈔行世

過關索嶺和家石門兄題壁韻

絕巘過千仞天空入翠微嶺危人怯上山峻鳥愁飛啼  
狄古今在浮雲瞬息非鄉關回望處馬首幾時歸

過盤江河鐵索橋

萬里聯鑣過盤江古堞荒鑿山尋鳥道冶鐵鎖津梁漫  
弔遺賢蹟翻憐驛卒忙險稱天下絕征客盡愴惶

同藺茂如謝子良汪曰吉學可弟冶臣姪遊鸚鵡

卷

振衣千仞望孤跡已凌空  
昆海連雲碧華山照日紅  
玉臺來鬼地金殿擬神工  
遊罷聯歸騎蕭蕭嘶晚風

積雨

積雨春光暮新波漾綠川  
雲寒鴻杳杳風急燕翩翩  
細草滋偏秀幽花濕更鮮  
片帆前路阻適興且調絃

秋日舟中卽事

短檝煙波外搖搖征客心  
乍涼朝怯簟初爽夜橫琴  
暮雨荆門醉秋風楚塞吟  
愁深常不寐起坐一披襟

和唐人章臺夜思

折柳人何處猿聲夜獨哀  
干戈接巫峽烽火滿章臺  
暮雨寒蛩響秋風旅雁來  
客心愁漏永歸棹幾時回

中秋夜荆邸思歸

如何今夜月還照異鄉身  
蛩語來孤館砧聲急比鄰  
酒堪消旅悶詩豈療途貧  
峽口西風激皇皇又問津

送許銓臣之蕪陰

同是江南客晴川獨送君  
琴書今日遠歌咏幾時聞  
赤壁波含月青山樹接雲  
來朝煙水上還應惜離羣

大河口別曹其人

同是天涯客孤篷我獨征  
贈詩增別憾酌酒慰離情  
柳葉章臺遠桃花漢水清  
前途多白眼行矣自怍怍

遊寶梵寺

閒來寶梵寺野色盡蒼蒼  
古砌留碑篆頽垣蝕佛光  
流

鶯啼老樹飛鼠宿危梁逸興遊難倦歸途帶夕陽

同吳憲文昆季張履吉登行者山晚眺得暉字

帆影映斜暉秋高見翠微煙霞迷古樹蘿薜挽寒衣去  
寺僧猶送投林鳥盡飛前溪漁父棹獨載月明歸

其二

憑高望遠暉樹影送帆微山峻還須杖秋深正授衣吳  
江葉已落楚國雁初飛牧笛聲聲響悠然牛背歸

武侯平南會盟處

萬仞荒山古樹垂千秋遺蹟武侯碑隆中已定三分業  
世上徒誇七縱奇天已默移炎漢祚公尤特擁蜀川師  
可憐鼎足今何在贏得君臣一做祠

阮陵溪中

長夏沅陵一鼓舩遙遙觸目盡蠻煙溪雲晝發棲青嶂  
箐霧朝浮散碧天泛泛輕鷗沙磧上聲聲杜宇野花前  
孤猿啼徹山鷄唱怕向溪頭看水旋

夏雲

綠樹森森最鬱葱雲容絡繹布天中無心出岫朝疑雨  
有意歸峯晚映虹蒼隼高騫還上下鷺龍斜掛或西東  
關山極目空無際變幻離奇信不窮

和陳素菴卽景漫咏

旅思遙生落照西尋幽頻過酒帘溪老農喜足三春雨  
征客愁聞五夜雞灼灼天桃花正艷陰陰弱柳葉多齊

花茵坐處閒聽鳥杜宇聲兼百舌啼

和素菴旅夜誌懷

春深猶覺做裘寒午夜攤書興欲闌彈鋏馮生原有意  
折腰陶令應休官挑燈看劍光偏射泄露尋花逕未乾  
回首關河兄弟遠荆雲鄂渚一音難

蓼臺湖夜泛二絕

秋水接長天寒蟬噪暮煙西風吹薄袂短櫂過前川  
秋漲沒長堤輕橈度岸西前溪明月上衰柳晚煙迷

舟中午夢

風雨蕭蕭泛小舫孤蹤飄泊類浮萍倦來正結莊周伴  
恠殺鶯聲又喚醒

余廷堦

字翊辰又字夢萱歙人籍湖廣黃岡少入太學嘗有聲菴林善詩歌古文詞以家貧親老客遊以養一時紳士傾企惟恐納交弗及也性質直一語不合輒掉臂去人益重其才品予友朱君自觀選入詩正予讀而喜之爲入歙雅尚將廣搜其著述刻之

九日同友人泛舟湖上看大水

澤國洪流震波臣盡怒號有山皆築室無地可登高笑  
傲凌千頃浮沉任小舫茱萸何處覓且共醉香醪

除夕同二弟殿宣讀史

此夕年年號歲除未知除法是何如汝評南北六朝事  
我讀東西兩漢書千古廢興雙蠟淚一時感慨半窗虛  
坐淡不盡清樽興樵鼓驚聞漏斷初

李翼孫先生葦軒落成集杜

郭外軒楹殿幽居不用名  
禩花分戶映村徑逐門成石  
秀連雲古山光見鳥情興  
移無灑掃心跡喜雙清

壽內

勸汝一卮酒漫辭顏欲紅  
相看書劍外知已唱隨中  
世態從人薄清操且自同  
還憐小兒女解學老萊風

已卯仲春上浣黃慎修移樽  
過程雯修半軒招全李餘菴  
先生吳以寧周京孫高霞家  
殿宣弟宴

集用杜工部韻唱和

連朝春雨後霽色散輕煙  
不信黃公酒能招李白眠

以今春苦雨不與譙會惟黃子招乃至論文皆俊逸卜地更幽偏喜有同

心約傳孟莫計年

遊洪山寺懷汪調文甥婿

極目窮千里江山一望收  
林陰出古寺日色冷荒丘  
對客敲新句啣杯憶舊遊  
蒼茫天際遠何處是真州

送孫高霞之西湖

同是天涯客何當送傲裝  
愁淡酒不解話別夜偏長  
故國風應好新詩墨欲香  
興亡多往事莫漫弔斜陽

闡中憶古栢

百尺虬龍自昔真幾經寂  
莫老風塵懷竒漫許裁爲棟  
不偶何妨伐作薪彷彿猶餘  
香在夢低徊空說巧通神

相傳坐此號者作文若有神助

聖朝首重儲楨幹重植還期  
雨露新

述梅

一春花事盡蹉跎花老春殘奈若何乍雨乍晴天意亂  
半家半客我愁多難將懶緒酬詩債惜得閒陰飽睡魔  
到處流鶯能弄舌不堪絮語耳邊過

老女歎

標梅冰泮屢逾時暗裏傷情祇自知料得光陰能有幾  
春來依舊悞佳期



